



重校正唐文粹卷第七

吳興姚

鉉

古賦庚摠一十四首

鳥獸昆虫

大鵬賦李白

鵬賦杜甫

白鷗賦蕭穎士

白鸚鵡賦王維

感二鳥賦韓愈

白羽扇賦張九齡

玄猿賦吳筠

塵尾賦陳子昂

由鹿賦呂溫

蠶賦陸龜蒙

秋蟲賦羅隱

蝨賦李商隱

後蟲賦陸龜蒙

蝸賦李商隱

大鵬賦并序

李白

余昔於江陵口見天台司馬子微謂余有仙風道骨可與神遊八極之表因著大鵬遇希有鳥賦以自廣此賦已傳于世往往人間



見之悔其少作未窮宏達之旨中年棄之及讀晉書觀阮宣子大鵬讚鄙心陋之遂更記憶多將舊本不同今復存于集豈敢傳諸作者庶可示之子弟而已其辭曰

南華老仙發天機于漆園吐崢嶸之高論開浩蕩之奇言徵至怪于齊諧談北溟之巨魚吾不知幾千里其名曰鯤化成大鵬質疑肝渾脫脩鬣于海島張廣翅于天門刷渤澥之春流晞扶桑之朝暾赫弈乎宇宙憑凌乎崑崙一鼓一舞煙矇沙昏五嶽爲之震蕩百川爲之崩奔爾乃蹶厚地摩太清亘層霄突重溟激三千以崛起搏九萬而迅征背業太山之崔嵬翼舉垂雲之縱橫左迴右旋倏陰忽明歷汗漫以天橋翔閭闔之崢嶸簸鴻濛扇雷霆斗轉而天動山搖而海傾怒無所搏雄無所爭固可想象其勢騁騁其形若乃足縈虹蜺目耀日月連軒沓拖揮霍翕忽噴氣則六合生雲灑毛則千里飛雪邈彼北荒將窮南隅遞逸翻以傍鼓擊奔騰而長駟燭龍銜光以照影列缺施鞭而啓塗塊視三山杯觀五湖其

動也神應其行也道俱任公見之而罷釣有窮不敢以變孤莫不投竿失鍬仰之長吁爾其雄姿壯觀映背河漢上摩蒼蒼下覆漫漫盤古開天而直視羲和倚日以傍歎繽紛乎八荒之間隱映乎四海之半橫大明而掩書若混茫之未判忽騰覆以迴旋則霞廓而霧散然後六月一息至于海湄欵翳景以橫楮逆高天而下垂憩乎泱漭之野入乎汪洋之地猛勢所射餘風所吹溟漲沸渭巖嶽紛披天吳爲之怵慄海若爲之躩踞巨鼇冠山而却走長鯨騰海而下馳縮殼挫鬣莫之敢窺吾亦不測其神怪而若此蓋乃造化之所爲豈比夫蓬萊之黃鵠誇金衣與菊裳耻蒼梧之玄鳳耀綵質與錦章旣服御于靈仙亦馴擾于池隍精衛殷勤于銜木鷄鷓悲愁平薦觴天雞警曙于蟠桃跋鳥炳耀于太陽不曠蕩而縱適何拘攣而守常未若茲鵬之逍遙無厭類而比方不矜大而暴猛每順時而行藏叅玄根以比壽飲元氣以爲漿戲暘谷而徘徊憑炎洲而抑揚俄而希有見而謂之曰偉哉鵬乎若此之樂也吾

左翼掩乎東極右翼蔽乎西荒跨躡地絡周旋天綱以恍惚爲巢以虛無爲場我呼爾遊爾呼我翔於是太鵬許之欣然相隨此二禽已登于寥廓而尺鷃之輩空見笑于藩籬

鵬賦 并進表

杜甫

臣甫言臣之近代陵夷公侯之貴磨滅鼎銘之勳不復照耀於明時自先君恕預以降奉儒守官未墜素業矣亡祖故尚書膳部員外郎先臣某脩文於中宗之朝高視於藏書之府故天下學士到于今而師之臣幸賴先臣緒業自七歲所綴詩筆向四十載矣約有千餘篇今賈馬之徒得排金門上玉堂者甚衆矣唯臣衣不蓋體常寄食於人奔走不暇祇恐轉死溝壑安敢望仕進乎伏惟明主哀憐之儻使執先祖之故事拔泥塗之久辱則臣之述作雖不足以鼓吹六經先鳴數子至於沈鬱頓挫隨時敏捷而揚雄枚臯之流庶可跂及也有臣如此陛下其舍諸伏惟明主哀憐之無令役役便至於衰老也臣甫誠惶誠恐頓首頓首死罪死罪以爲鵬

者鷲鳥之殊特搏擊而不可當豈但壯觀於旌門發狂於原隰引以爲類是大臣正色立朝之義臣竊重其有英雄之姿故作此賦實望以此達於聖聰耳不揆蕪淺謹投延恩匭進表獻上以聞謹言

賦

當九秋之清淒見一鷲之直上以雄材爲已任橫殺氣而獨往捎捎勁翮肅肅遺響杳不可追俊無留賞彼何鄉之性命碎今日之指掌伊鷲鳥之累百敢同年而爭長此鷲之大略也若乃虞人之所得也必以氣稟玄冥陰乘甲子河海蕩瀆風雲亂起雪互山陰冰纏樹死迷向背於八極絕飛走於萬里朝無所充腸夕違其所止頗愁呼而蹭蹬信求食而依倚用此時而採杖待弋者而網紀表狎羽而潛窺順雄姿之所擬欵捷來於森木固先繫於利觜解騰攫而竦神開網羅而有喜獻禽之課數備而已及乎閩隸受之也則擇其清質列在周垣揮拍擊之掣曳挫豪梗之飛翻識改遊

之所使登馬上而孤騫然後綴以珠飾呈於至尊搏風槍槩用壯
旌門乘輿或幸別館獵平原寒蕪空闊霜仗喧繁觀其夾翠華而
上下卷毛血之崩奔隨意氣而電落引塵沙而書昏豁堵墻之榮
觀棄功效而不論斯亦足重也至如千年孽狐三窟狡兔恃古塚
之荆棘飽荒城之霜露回惑我往來越越我場圃雖青骹戴角白
鼻如瓠蹙奔蹄而俯臨飛迅翼以遐寓而料全於果見迫寧遽屢
攬之而穎脫便有若於神助是以嘒哮其音颯爽其慮續下韝而
繚繞尚投跡而容與奮威逐北施巧無據方蹉跎而就擒亦造次
而難去一竒卒獲百勝昭著風宿多端蕭條何處斯又足稱也爾
其鷓鴣鴝鵒之倫莫益於物空生此身聯拳拾穗長大如人肉多
奚有味乃不珍輕鷹隼而自若託鴻鵠而爲鄰彼壯夫之慷慨假
強敵而逡巡拉先鳴之異者及將起而造臻忽翻天路終辭水濱
寧掩羣而盡取且決意而驚新此又一時之俊也夫其降精於金
立骨如鐵目通於腦筋入於節架軒楹之上純漆光芒掣染棟之

間寒風凜冽雖趾矯千變林嶺萬穴繫叢薄之不開突杓扞而皆
折又有觸邪之義也久而服勤是可吁畏必使烏攫之黨罷鈔盜
而潛飛梟怪之羣想英靈而遽墜豈比乎虛陳其力叨竊其位等
摩天而自安與槍榆而無事者矣故不見其用也則晨飛絕壑暮
起長汀來雖自負去若無形置巢截菓養子青冥倏爾年歲茫然
闕廷莫試鉤爪空迴斗星衆鷓鴣割鮮於金殿此鳥已將老於巖
窟

白鷗賦 并序

蕭穎士

白鷗羽族之幽竒也素質黑章爪觜純丹體備冠距頗類夫雞翟
神兒清閑不雜於衆禽栖止遐深與人境罕接固莫得而馴狎也
上聞而徵焉處以雕籠致以駟騎將集長楊游太液行有日矣天
寶辛卯歲予旅泊江會流宕逾時秋八月自山陰前次東陽方議
夫南登西泛極聞見之義諒褊懷所素蓄而未之從也會有命自
天台赴京關適與茲鳥偕至于會稽之傳舍觀其宛頸旁睨徊徨

掩抑往往孤鳴音韻淒涼如慕侶而不獲因感而賦之曰
鳥之生矣于彼江山彩之玄素文不綺班備文武之玉飾微妖姬
之殊顏情莽眇以耿絜兒軒昂以安閑無馴擾之近性故不愜於
人寰遊必海裔栖必雲間冀養拙以自保祛未萌之憂患不然豈
陋彼都邑之佳麗顧投身乎阻艱以其標自然之靜故名之曰白
鵬者歟何天聽之緬邈辱微禽之瑣細偶一日之見羈委微軀以
受制望層城以歛翼懷衆侶而孤唳從殿置之駿奔仰君門以遐
逝君門兮九重同叫窳兮穹崇池太液兮島方壺萬族翔沫乎其
中晝聒未央之繁絃夕警長樂之靈鍾顧踈野之賤迹豈敢求一
枝而見容越水清兮鏡色吳山遠兮天逼窺淺深以颺影逗杳冥
兮一息謂杉松可得永日而噪聚尊苻足以窮年而啄食一與心
賞兮睽違念歸飛兮何極鸚能言而入座鸚善舞而登軒殊二者
之俗態諒慚惶於主恩是以雖信美而非其志獨屏營而兢鬼者
焉

白鸚鵡賦

王維

若夫名依西域族本南海同朱喙之清音變綠衣於素彩惟茲鳥
之可貴諒其美之斯在爾其入翫於人見珍竒質狎蘭房之妓女
去桂林之雲日易喬枝以羅袖代危巢以瓊室慕侶方遠依人永
畢託言語而雖通顧形影之非匹經過珠網出入金鋪單鳴無應
隻影長孤偶白鵬於池側對皓鶴於庭隅愁混色而難辨願知名
而自呼明心有識懷恩何極芳樹絕想鵬梁撫翼時銜花而不言
每投人以方息慧性孤稟雅容非飾含火德之明輝被金方之正
色至如海鷺呈瑞有玉篋之可依山雞學舞向寶鏡而知歸皆羽
毛之偉麗奉日月之光輝豈憐茲鳥地遠形微色凌紈質彩奪繒
衣深籠久閉喬木長違儻見借其羽翼與遷鸞而共飛

感二鳥賦 并序

韓愈

貞元十一年五月戊辰愈東歸癸酉自潼關出息于河之陰時始
去京師有不遇時之歎見行有籠白鳥白鸚鵡而西者號於道曰

某土之守其官使使者進於天子東西者皆避路莫敢正目焉因竊自悲幸生天下無事時承先人之遺業不識干戈攻守耕穫之勤讀書著文自七歲至今凡二十二年其行已不敢有愧於古人之道其閑居思念前古當今之故亦僅志其一二大者焉選舉於有司與百十人偕退曾不得薦書蔭下士于朝以仰望天子之光明今是鳥也惟以羽毛之異非有道德智謀承顧問贊教化者乃反得蒙採擢薦進光輝如此故爲賦以自悼且明夫遭時者雖小善必達不遭時者累善無所容焉其辭曰

吾何歸乎吾將旣行而後累思誠不足以自存苟有食其從之出國門而東驚觸白日之隆景時返顧以流涕念西路之差永過潼關而坐息窺黃流之奔猛感二鳥之無知方蒙恩而入幸惟進退之殊異增予懷之耿耿彼中心之何喜徒外飾焉是逞予生命之湮阮曾二鳥之不如汨東西與南北恒十年以不居辱飽食其有數况策名與薦書時所好之爲賢庸有謂余之非愚昔殷之高宗

得良弼於宵寐孰左右者爲之光容信天同而神比及時運之未來或兩求而莫致雖家到而戶說祗招尤而速累蓋上天之生余亦有期於下地盍未配於古人獨怊悵於無位雖得之而不能乃鬼神之所戲幸年歲之未暮庶無羨於斯類

白羽扇賦并序

張九齡

開元二十四年夏盛暑奉敕遣大將軍高力士賜宰臣白羽扇九齡與焉竊有所感立進賦曰

當時而用任物所長彼鴻鵠之弱羽出江湖之下方安知煩暑可致清涼豈無紈素彩畫文章復有脩竹剖枿毫芒提携密邇搖動馨香惟衆珍之在御何短翮之敢當與竊恩於聖后且見持於未央伊昔臯澤之時亦有雲霄之志苟効用之得所雖殺身而何忘肅肅鳥羽穆如微風縱秋氣之移奪終感恩於篋中

玄猿賦并序

道士吳筠

前志稱周穆王南征君子變爲猿鶴小人變爲蟲沙夫神用無方

未必不爾筠自入廬嶽則覩斯玄猿嘉夫雨昏則無聲景霽則長
嘯不踐土石超遙於萬木之間春咀其英秋食其實不犯稼穡深
棲遠處猶有君子之性異乎狙猿之倫且多難已來庶品凋敗麋
鹿殫於網罟遺氓困於誅求此獨蕭然物莫能患豈不以託跡冥
絕不才遠禍昔夫子歎山梁雌雉曰時哉時哉予因感之聊以作
賦

伊玄猿之所育于南國之曾岑動不踐地居常在林雖泛泛而無
據亦熙熙而有心霧嵐昏而共默風雨霽而爭吟使幽人之思清
暢羈客之涕霑襟何必聆嶰谷之管對雍門之琴哉歷千尋之喬
木俯萬仞之危嶠弄遊雲之亂飛嬉落日之橫照連肱澗飲命侶
煙嘯或聚而閑棲或分而迥趨壽同靈鷲性本君子阻重巖之險
非虎豹所履蔭交柯之密豈鷓鴣能視故逢蒙操弓憚高深而止
鄧公折箭含惻隱而已何患累之罕臻不干物以利已詎若佛佛
凌人以就戮猩猩甘酒而遄死夫時珍貂裘世寶狐白徒能工於

隱伏終見陷於機辟麝懷香以賈害狙伎巧而招射小則翡翠殞
於毛羽大則犀象殘於齒革孰能去有用之損取無用之益固弃
置於常情求逍遙以自適無威刑以相臨有族類而相親食資諸
物衣取諸身不賦不役靡勞靡勤如政教之未施保巢居之淳淳
匪虞氏之所及何徂公之能馴吾固知人爲物之貴又焉測元化
之所大均乎

麈尾賦 并序

陳子昂

甲子歲天子在洛陽時余始解褐與秘書省正字太子司直宗秦
客置酒於金谷亭大集賓客酒酣共賦座上食物命余爲麈尾賦
焉

天子浩浩兮物亦云云性命變化兮如絲之棼或以神好正直天
蓋默默或以道惡強梁天亦茫茫此仙都之微獸因何負而罹殃
始居幽山之藪食乎豐草之鄉不害物以利己每營道而同方何
忘情以委代而任性之不忘卒罟網以見逼受庖割而罹傷豈不

以斯尾之有用而殺身於此堂爲君彫俎之羞則君金盤之實承
主人之嘉慶對象筵與寶瑟雖信美於茲辰詎同歡於疇日客有
感之而歎曰命不可思神亦難測吉凶悔吝未始有極假如天道
之用莫神於龍受戮爲醢不知其凶王者之瑞莫聖於麟遇害於
野不知其仁神既不能自智聖亦不能自知況林棲而谷走及山
鹿與野麋古人有言天地之心其間無巧冥之則順動之則天諒
物情之不異我心又何兢於猜矯故曰天之神明與物推移不爲
事先動而輒隨是以至人無已聖人不知子欲全身而遠害曾是
浩然而順斯

由鹿賦 并序

貞元丁卯歲予南出穰樊之間遇野人繫鹿而至者問之荅曰此
爲由鹿由此鹿以誘致羣鹿也備言其狀且曰此鹿每有所致輒
鳴嗥不飲食者累日余喟然歎曰虞之即鹿也必以其類致之人
之即人也亦必以其友致之實繁有徒古之然矣嗟乎鹿無情而

猶知痛傷人之與謀寔安殘酷者彼何人斯彼何人斯物微感深
遂作賦曰

鹿之生兮亦稟亭毒備齒角以無競循性情而自牧姑有昧於行
止尚焉知乎倚伏捨爾崇林輕遊近麓偶巧網之生致蒙主人之
全育飲以溲井飼于芳庭寢卧荃柔騰倚蘭馨露往霜來日安月
寧雖矯性之非樂終感恩而不驚曾不知養非玩物用有深意命
之曰由俾陷其類涼秋八月爽景清氣羈致山阿縻于蹊隧設伏
以侍翳叢而伺同氣相求誘之孔易將必慕侶豈云貪餌叨和
鳴麋麋狎至彼泯慮於猜信此無情於誠僞孰是蒼卒禍生所忽
毒鏑欵以星貫潛機劃其電發或洞胃而達腋或折足而碎骨望
林巒兮非遠顧町疇兮未滅風嗥澤而北至日掩山而西沒走駭
侶於巖煙叫飢羸於澗月苟行路之聞者孰不心摧而思絕想爾
由矣野心而仁望純束而驚顧隨獲車兮逡巡視鼎中之銷爛觀
机之上剖分忽哀鳴以感類若沈痛之在身雖復處之密邇享以

豐珍比檻狝之駭躍同海鳥之愁辛敢擇陰而後止思走險以何
因痛無知以相陷含怨毒而莫伸客有感而言曰物誠有諸人亦
宜平撫事或比原心則殊借如淮陰構禍寃在神理通說且拒徐
謀寧起堂堂蕭公實曰知己給致鐘室胡寧忍此呂祿之難誰非
漢臣交則不義實亦不仁彼美酈生既為交親誘襲軍印豈無他
人於戲微獸傷類如不自容伊人賣友而享其功滅交道兮墜義
風曾麋鹿之不若何仁信之可宗已焉哉諒此世之茫茫吾未見
其始終

蠶賦 并序

陸龜蒙

荀卿子有蠶賦楊泉亦為之皆言蠶有功於世不斥其禍於民也
余激而賦之極言其不可能無意乎詩人碩鼠之刺於是乎在
古民之衣或羽或皮無得無喪其游熙熙藝麻緝繡官初喜窺十
奪四五民心乃離逮蠶之生繭厚絲美機杼經緯龍鸞葩卉官誕
益囋盡取後已嗚呼既秦而烹蠶實病此伐桑滅蠶民不凍死

秋蟲賦 并序

羅隱

秋蟲蜘蛛也致身網羅間實腹亦網羅間愚感其理有得喪因以
言賦之

物之小兮迎網而斃物之大兮兼網而逝網也者繩其小而不繩
其大吾不知爾身之危兮腹之餒兮吁

蟲賦

李商隱

亦氣而孕亦卵而成晨鷺露鶴不如其生汝職唯齧而不善齧回
臭而多跖香而絕

後蟲賦 并序

陸龜蒙

余讀玉谿生蟲賦有就顏避跖之嘆似未知蟲作後蟲賦以矯之
衣緇守白髮華守黑不為物遷是有恒德小人趨時必變顏色弃
瘠涵腴乃蟲之賊

蝎賦

李商隱

夜風索索綠隙憑壁弗聲弗鳴潛此毒螫厥虎不翅厥牛不藍爾

兮何功既角而尾

重校正唐文粹卷第七

重校正唐文粹卷第八

古賦辛 摠七首

古器三

霜鍾賦 喬潭

磁石賦 劉禹錫

物景二

晚晴賦 杜牧

決疑二

問大鈞賦 劉禹錫

霜鍾賦 并序

何卜賦

喬潭

秋聲賦 劉禹錫

歌器賦 李德裕

吳興姚

鉉

纂

南陽豐山有九鍾焉霜降則鳴潭叨遇達奚公擢甲科然則南陽即公隱居之舊地為此賦以廣知音焉
豐山之峯巖崑積翠之石森爽冒寒之松上無飛鳥下無人蹤何

杳杳以靜謐有天然之古鍾兩樂神資九乳靈化寧失制於侈掄
豈遺音於宛樞每虛氣以自得常宿懸以警下動於耳而藏於心
必高秋之涼夜於是沈寥兮日暮而天晶蕭瑟兮霜落而風清爽
氣無朕潛來滿盈跳然復出鏗爾有聲信不擊而不考能大鳴而
小鳴始則含糊擁鬱旋復充詰若往若還徘徊其間爾其舒肆奔
放長樂遠暢乍浮空以紆餘更觸物而瀏亮入林肅肅在水湯湯
泛濫小瀨聯聯踈篁夜鶴怨兮彌苦寒後悲兮更長餘韻春容隨
風悠揚繞於洞庭浮於瀟湘梧楸紛以離披蒹葭颯其蒼蒼及夫
夜以艾兮彌靜山無人兮月冷初蕭蕭以自淒復琅琅而虛警其
動愈出其來甚徐合於元化遊於太虛轉遠而盡誰知所如聊獨
坐於傾聽惘若失乎躊躇聽不及想以存其餘方其寒氣曉集鏘
然應急發越林巒周流井邑前聲未盡後韻相及羈臣之空館屢
來思婦之高樓遠入無不依然驚夢歎歎掩泣夫鍾之應霜也應
以無心士之知己也貴知其音不鼓而鳴者其聲遠不言而信者

其分深故自然之聲無假於煩手持達之分不資於膝口吾欲徵
華鍾喻良友懷音淵默藏器虛受可以適南陽待清霜之一扣系
曰風籟起乎喧長薄霜鍾鳴兮動哀壑合大塊兮聲無作雖有聞
兮常寂寞

歌器賦 并序

李德裕

癸丑歲余時在中樞丞相路公見遺歌器贈以古人之物永懷君
子之心嘗欲報以辭賦屬力小任重朝夕盡瘁固未暇於體物今
者公已歿世余有放逐忽覩茲器悽然懷舊因追爲此賦置公之
靈筵

昔周道既平既安且寧赫赫公旦配德阿衡謂難守者成難持者
盈始作茲器告于神明至仲尼憲文武之道思周公之德入太廟
而觀器見遺法而歎息且曰月滿而虧日盈則吳彼天道之常然
欲久盛而焉得乃沃水於器俯察要終挹彼注茲授之若冲虛則
艱峻似君子之困蒙中則端平如君子之中庸滿則傾趺霆流電

發器如隄隤水若河決非神鼎之自盈異衢樽之不竭蓋欲表人道之隆替明百事之有節然茲器也不以中而自藏不以跌而自傷其過也如彼薄蝕其更也浸彼輝光得其道者居則念於豐蔀動乃思於謙受顏既復而不遠惠屢黜而何咎知任重之力及悟物盈之難久雖神道之無形常慘然於前後昔與君子同秉國鈞公得之爲賢相余失之爲放臣覩遺物而猶在懷舊好而悲辛思欲克已以復禮永報德於仁人

砥石賦

并序

劉禹錫

南方氣泄而雨淫地慝而傷物媪神噫濕渝色壞味雖金之堅亦失恒性始余有佩刀甚良至是澁不可拔剖其室乃出遯陽眇眩傳刃蒙脊鱗然如痂如黑子如青蠅之惡銳氣中錮猶人被病然客有聞焉裛密石以遺予沃之草腴雜以烏膏切劑下上直質焯見躊躇四顧迨爾謝客微子之貽幾喪吾寶客曰吾聞諸梅福曰爵祿者天下之砥石也高皇帝所以礪世磨鈍有是耶余退感

其言作砥石賦

我有利金兮以利爲佩遭土卑而慝作雄銛爲之潛晦如景昏而蝕既兮與肌漆而爲癘顧秋蓬之不可刺兮尚可遊乎醜髀之外利物蒙蔽材人惆悵俾百汰之至精燔一檢而多恙豈害氣之獨然兮將久不試而然彼屠者之刀兮獵者之鋌不灌不淬兮糅錯銜銛日鼓月揮兮剗腴擊鮮皖燿燿以耀芒翁淫夷而騰羶豈不以涉暑而蒙沴兮鼎用之而成妍有客自東遺余越砥圭形石質蒼色膩理刻其鱗皴滑以滫隨如衣澣垢如鼎出否霧盡披天萍開見水拭寒焰以破昔擊清音而振耳故態復還寶心再起既賦形而終用一蒙垢焉何耻感利鈍之有時兮寄雄心於瞪視嗟乎石以砥焉化鈍爲利法以砥焉化愚爲智武王得之商俗以厚高帝得之傑材奔走得既有自失豈無因漢氏已還三光景分隨道闊狹用之得人五百餘年唐風始振懸乎天砥以龔兆民播生在天成器在君天爲物君君爲人天安有執礪世之具而患乎無賢

歟

晚晴賦 并序

杜牧

秋日晚晴樊川子目于郊園見大者小者有狀類者故書賦云
 雨晴秋容新沐兮忻遶園而細履面平池之清空兮紫閣青橫遠
 來照水如高堂之上見羅幕兮垂平鏡裏木勢黨伍兮行者如迎
 偃者如醉高者如達低者如跂松數十株切切交峙如冠劍大臣
 國有急難庭立而議竹林外裏兮十萬丈夫甲刃縱縱密陣而環
 待豈負軍令之不敢置兮何意氣之嚴毅復引舟于深灣忽八九
 之紅芰姹然如婦歛然如女隋素藥黠顏似見放棄白鷺潛來兮瀨
 風標之公子窺此美人兮如慕悅其容媚雜花差於岸側兮絳綠
 黃紫格頑色賤兮或妾或婢閒草甚多叢者束兮靡者香兮仰風
 獵日如立如笑兮千千萬萬之容兮不可得而狀也若予者則謂
 何如倒冠落珮兮與世闊踈教教休休兮真徇其愚而隱居者乎

秋聲賦 并序

劉禹錫

相國中山公賦秋聲以屬天官太常伯唱和俱絕皆得時道行之
 餘興猶動光陰之歎況伊鬱老病者乎吟之斐然以寄孤憤
 碧天如水兮窅窅悠悠百蟲迎暮兮萬葉吟秋欲辭林而蕭颯潛
 命侶以啁啾送將歸兮臨水非吾土兮登樓晚枝多露蟬之思夕
 草起寒蠶之愁至若松竹含韻梧楸早脫驚綺疏之晚吹墜碧砌
 之涼月念塞外之征行顧閨中之騷屑夜蛩鳴兮機杼促朔雁叫
 兮音書絕遠杵續兮何泠泠虛室靜兮空切切如吟如嘯非竹非
 絲合自然之宮徵動終歲之別離廢井苔合荒園露滋草蒼蒼兮
 人寂寂樹槭槭兮蟲伊伊則有安石風流巨源多可平六符而佐
 主施九品而自我猶復感陰蟲之鳴軒歎涼葉之初墮異宋玉之
 悲傷覺潘郎之么麼嗟乎驥伏櫪而已老鷹在韝而有情聆朔風
 而心動聆天籟而神驚力將殍兮足受繼猶奮迅于秋聲

問大鈞賦 并序

始余失臺郎為刺史又貶州司馬俟罪朗州三見閨月人咸曰數

之極理當遷焉因作謫九年賦以自廣是歲臘月詔追明年自闕
下重領連山郡印綬咸曰美惡周必復第行無恤歲杪其復乎居
五年不得調歲二月有事于社前一日致齋孤居慮靜滯念欸起
伊人理之不可以曉也將質諸神乎謹貢誠馳精敢問大鈞其夕
有遇寤而次第其辭以爲賦

圓方相溷兮浩其無垠宵冥翕闢兮三辰以騰振孰主張是兮有
工其神迎隨不見兮強名之曰大鈞歎以臨下兮巍乎雄尊天爲
獨陽高不可問工居其中與人差近身執其權心平其運循名想
像或可以訊曰嘻蒙之未生其猶泥爾落乎埏埴唯鈞所指忽然
爲人爲幸大矣工賦其形七情與俱嗇智不授卑去聲之以愚坦坦
之衢萬人所趨蒙一布武化爲畏途人或譽軒之百說徒虛入或
排之半言有餘物壯則老乃唯其常否終則傾亦不可長老先期
而驟至兮否踰數而叵量雖一夫不獲兮亦大化之攸病謹薦誠
上問兮俛伏以聽是夕寐熟夢遊乎無何之鄉抗陛級乎重宵兮

異人間之景光中有威神中金甲而焯煌命之使前兮其音琅琅
曰吾大化之一工也居上臨下無其不平汝今有辭吾一以聽播
形肖貌生類積億橐籥圜屈鎔鍊消息我之司智初不爾嗇不守
以愚覆爲汝賦既賦汝形輔之聰明盍求世師資適攸宜胡然抗
心遐想前烈倚梯青冥舉足斯跌韜爾智斧無爲自伐鑿竅太繁
天和乃洩利逕前誘多逢覆徹名腸內煎外火非熱今哀汝窮將
厚汝愚剔去剛健納之柔濡塞前竅之傷瘡兮招太和而興居貫
以待人兮急以自拘道存邃奧無示四隅軌物之勢不作兮見傷
之機自無汝不善用吾焉嗇乎且夫貞而騰氣者臚臚健而垂精
者昊昊我居其中猶輪是蹈以不息爲體以日新爲道僕鱗蜚走
灌莽苞阜乃牙乃甲乃殞乃剖陽榮陰悴生濡死藁各秉氣化不
以意造賦大運兮無有淑惡彼多方兮自生醜好爾奚不德余以
驟壯姑尤我以速老耶觀汝百爲又或不然赤子哇哇急其能言
亦旣名物幾時蹢躅春耕其丘投種之日釋耒而歎何時實粟望

所未至謂余舒舒欲其久留謂我譬如我一子二誰之曲歟彼兼
葭之蒼蒼兮霜霰苦而中堅松竹之皴皴索籜兮不若櫛筍之可
憐納材葦而構明堂固容消而力完楊且之哲兮不可以常然當
錫爾以老成蒼眉皓髯山立時行去敵氣與矜色兮噤危言以端
誠俾人望之侮黷不生爾之所得孰與壯多不善處老問余而何
授受而迴蘧蘧形開嚮之威神孰爲來哉乃遽衣促盥端慮滌想
委珮伍簪特簿叩顙而言曰楚臣天問不訓今臣遇幸一獻三售
始厚以愚終期以壽忘上問之罪濯已然之咎心增故術腸飽新
授馳神清玄拜手稽首

何卜賦

余既幻惑力命之說兮身久放而愈疑心回穴其莫曉兮將取質
夫東龜楚人俗巫而好術兮叟有鬻卜而來思乃招而訊之曰噫
人莫不塞有時而通伊我兮久而愈窮人莫不病有時而開伊我
兮久而滋蔓吾聞人肖五行動止有則四時轉續變於所極一歲

之旱人斯具舟三月之熱人斯具裘極必反焉其猶合符子首圓
而足方予腹陰而背陽胡形象之有肖而變化之殊常經曰剥極
則賁居賁而未嘗剥者其誰否極受泰居否而未嘗泰者又其誰
鸛胡不截鳧胡不裨蔓何罰而蹠蹠何功而扶持紛紜恣睢交
作舛馳似與似奪似信似欺孰主張之問于子龜卜者曰招我以
粗問我以微有天下之是非有仁人之是非在此爲美兮在彼爲
蚩或昔而成或今而虧君問曷由主張其時時乎時乎去不可邀
來不可逃淹兮孰捨操董之毒豕苓雞首之賤毛各於其時而伯
鬪其曹屠龍之伎非曰不偉時無所用莫若履絺作踊之工非曰
可珍時有所用貴于斷輪絡首縻足兮驥不能跬前無所阻兮跛
鼈千里同涉于川其時在風泐者之吉沂者之凶同執于野其時
在澤伊種之利乃糝之厄故曰是耶非耶主者時耶諒淑惡之同
出兮顧所丁之若何夫如是得非我美失非我耻其去曷思其來
曷期姑蹈常而俟之夫何卜爲言訖執龜而起予退而作何卜賦

於是蹈道之心一而俟時之志堅內視羣疑猶水釋然

重校正唐文粹卷第八

Blank columns for text in the right-hand page.

重校正唐文粹卷第九

古賦五 總十首

脩身一

動靜交相養賦 白居易

哀樂愁思八

懷忠賦 歐陽詹

望賦 劉禹錫

江上愁心賦 張說

愛而不見賦 蕭穎士

夢一

夢渴賦 何諷

動靜交相養賦 并序

白居易

居易常見今之立身從事者有失於動有失於靜斯由動靜俱不

吳興姚

鉉

纂

得其時與理也因述其所以然用自儆導命曰動靜交相養賦云
天地有常道萬物有常性道不可以終靜濟之以動性不可以終
動濟之以靜養之則兩全而交利不養之則兩傷而交病故聖人
取諸震以發身受以復而知命所以莊生曰智養恬易曰蒙養正
者也吾觀天文其中有程日明則月晦日晦則月明明晦交養晝
夜乃成吾觀歲功其中有信陽進則陰退陽退則陰進進退交養
寒暑乃順且躁者本於靜也斯則躁爲民靜爲君以民養君教化
之根則動養靜之道斯存且有者生於無也斯則無爲母有爲子
以母養子生成之理則靜養動之義明矣所以動之爲用在氣爲
春在鳥爲飛在舟爲楫在弩爲機不有動也靜將疇依所以靜之
爲用在蟲爲蟄在水爲止在門爲楗在輪爲柅不有靜也動奚資
始則知動兮靜所伏靜兮動所倚吾何以知交養之然哉以此有
以見人之生於世出處相濟必有時而行非匏瓜不可以長繫人
之善其身枉直相循必有時而屈故尺蠖不可以長伸嗟夫今之

人知動之可以成功不知非其時動亦爲凶知靜之可以立德不
知非其理靜亦爲賊大矣哉動靜之際聖人其難之先之則過時
後之則不及時交養之間不容毫釐故老氏觀妙顏子知幾噫非
二君子吾誰與歸

懷忠賦 并序

歐陽詹

丙寅歲因受譴季冬之月次于殷墟歷關龍逢墓焉昔聆其風未
嘗不迴腸貫涕覩夫塋壟心又增傷遂寫憤于言爲賦以弔先生
以忠諫致命故以懷忠命篇云

天生彼辛兮用殲覆于夏家欲悠悠而罔極毒浩浩而無涯無辜
殞身肆市朝之若莽有道併命委炮烙以如麻伊先生之諤諤爲
酷烈之所加嘗披圖於徃載每廢卷於興嗟蕭條舊邑莽蒼空陂
陷陵成坎古木無枝或人曰此其墓也又一倍以增悲嗚呼麟非
騰噬之儔詎虎狼之共穴鳳實仁靈之類豈鷹鷂之同列惟玉石
之明分亦薰蕕之自別是以蹇蹇心競昂昂面折彼炎炎之原燎

信撲撲而不滅寧歸死以申懷不貪生而結舌痛矣哉古人有言
輔仁者天福善者神胡爲是日功不如人使典章之不信俾忠義
之空勤律中大呂日臨蒙谷風颼颼於衰草煙茫茫乎平陸思悽
悽而填臆淚淫淫以盈目義則非其知友親故遠夫骨肉節臨危
而不撓行於艱而彌篤惟其有之是以傷之而慟哭

泛渭賦并序

白居易

右丞相高公之掌貢舉也予以鄉貢進士舉及第左丞相鄭公之
領選部也予以書判拔萃登科十九年天子並命二公對掌鈞軸
朝野無事人物甚安明年春予爲校書郎始徙家秦中卜居渭上
上樂時和歲稔萬物得其宜下樂名遂官閑一身得其所旣美二
公佐清靜之理又荷二公垂特達之遇發於嗟嘆流於詠歌于時
泛舟于渭因爲泛渭賦以導其意辭曰

亭亭華山下有人跂兮望兮愛彼三峯之白雲泛泛渭水上有舟
公兮泝兮愛此百里之清流以我爲太平之人兮得於斯而優游

又感陽春之氣熙熙兮樂天和而不憂曰予生之幸兮時哉時哉
當皇唐受命之九葉兮夷與華而無氛埃及皇帝續位之二紀兮
命高與鄭爲鹽梅二賢兮爰立四門兮大開凡讀儒書與履儒行
者率充賦而四來雖片藝而必收兮故不棄予之小才感再遇於
知己心慙忤以徘徊登予名於太常署予職於蘭臺臺有蘭兮閣
有芸芳菲菲兮可襲備一官而無事又不維而不繫家去省兮百
里每三旬而一入川有渭兮山有華澹悠悠其可賞目白雲兮漱
清流且或偃而或仰門去渭兮百步常一日而三往夜分兮扣舷
天無雲兮水無煙遲遲兮明月波淡灑兮棹寅緣日暮兮舟泊草
萋萋兮沙漠漠習習兮春風岸柳動兮渚花落發浩歌以長引舉
濁醪而緩酌春冉冉兮其將盡予何爲乎不樂鳥樂兮雲際鳴嚶
嚶兮飛裔裔魚樂兮泉底鬢撥撥兮尾澈澈我樂兮聖代心融融
兮神泄泄伊萬物各得其樂者由聖賢之相契賢致聖於無爲聖
致時於旣濟疑爲和兮聚五福發爲春兮銷六沴不我後兮不我

先適當我兮生之世彼鱗蟲與羽族咸和樂而不知惠我爲人兮
最靈所以愧賢相而荷聖帝樂乎樂乎泛于渭兮詠而歸聊逍遙
以卒歲

望賦

劉禹錫

邈不語兮臨風境自外兮感從中明晦轉續兮八極鴻蒙上下交
氣兮羣生異容發孤照于寸眸驚遐情乎太空物乘化兮多象人
遇時兮不同嗟乎有目者必騁望以盡意當望者必緣情而感時
有待者瞿瞿忘懷者熙熙慮深者瞠然若喪樂極者冲然無違外
徙倚其如一中糾紛兮若斯望如何其望最樂晞慶霄兮邈阿閣
如雲兮天顏咫尺如草兮臣心踴躍扇交翟兮歲蕤旗升龍兮燧
略日轉黃道天開碧落凝瑞景於庭樹掬非煙於殿幕望如何其
望且懼登灞岸兮見長安紛擾擾兮紅塵合鬱葱葱兮佳氣盤池
象漢兮昭回城依斗兮闡干避御史之駟馬逐倖臣之金丸望如
何其望彼好宗萬靈兮越四隩漢帝仙臺兮秦皇海嶠覽衣踴于

河上馬跡窮乎越徼紫氣度關而斐壘神光屬天而照耀睨眷眷
以馳精聳尊尊而觀妙望如何其望有形視蠢蠢兮窮冥冥楚塞
氛惡兮蕭關燧明暈籠孤月角奮長庚沙多似雪積有疑城煙雲
非女子之氣草木盡王者之兵審曳柴之虛警破來騎之先聲信
有得于風鳥示無言于旆旌望如何其望且慕恩意隔兮年光驚
雕輦已辭兮金屋何處長信草生兮長門日暮倏翠華之儻來仰
玄天以自訴况復湘水無還漳河空注淚染枝葉香餘紈素風蕭
蕭兮北渚波煙漠漠兮西陵樹夫不歸兮江上石子可見兮秦原
墓拍琴翻朔塞之音挾瑟指邯鄲之路望如何其望最傷佩環玦
兮思帝鄉龍門不見兮雲霧蒼蒼喬木何許兮山高水長春之氣
兮悅萬族獨含頻兮千里目秋之景兮懸清光偏結憤兮九回腸
羨環拱于白榆惜馳暉于落棠諒衝斗兮誰見伊戴盆兮何望轡
豈止蘇武在胡管寧浮海送飛鴻之滅没附陰火之光彩鶴頸長
引烏頭未改恨已極兮平原空起何時兮東山在求望如何傷懷

孔多降將有依風之感宮人成憶月之歌歌曰張衡側身愁思久
王粲登樓日迴首不作渭濱垂釣臣羞爲洛陽拜塵友

惜餘春賦

李白

天之何爲令北斗而知春兮迴指於東方水蕩漾兮碧色蘭蕙
兮紅芳試登高而望遠極雲海之微茫竟一去兮欲斷淚流頰兮
成行吟青楓而詠滄浪懷洞庭兮悲瀟湘何餘心之縹緲兮與春
風而飄揚飄揚兮無限念佳期兮莫展平原萋兮綺色愛芳草兮
如翦惜餘春之將闌每爲恨而不淺漢之曲兮江之潭把瑤草兮
思何堪想遊女於峴北愁帝子於湘南恨無極兮心氤氳目眇眇
兮憂紛紛披衛情於淇水結楚夢於陽雲春每歸兮花開花已闌
兮春改嘆長河之流春送馳波於東海春不留兮時已失老衰颯
而情逾在恨不得挂長繩於青天繫西飛之白日若有人兮情相
親去南國兮往西秦見遊絲之橫路網春輝以留人沉吟兮哀歌
躑躅兮傷別送行子之將遠看征鴻之稍滅醉愁心於垂楊隨柔

條以糾結望夫君兮興咨嗟橫涕淚兮怨春華遙寄影於明月送
夫君於天涯

江上愁心賦

張說

江上之峻山兮鬱崎嶇嶇音儀而不極雲爲峯兮煙爲色歛變態兮心
不識江上之深林兮杳冥蒙而不已鳥爲花兮猿爲子紛盪漾兮
言莫擬夏雲陰兮若山秋水平兮若天冬沙飛兮浙浙春草靡兮
芊芊感四節之默運知萬化之潛遷伴衆鳥兮寒渚望孤帆兮日
邊雖欲貫愁腸於巧筆紡離夢於哀絃是心也非模放之所逮將
有言兮是然將無言兮是然

別知賦

韓愈

予取友於天下將歲行之兩周下何深之不即上何高之不求紛
擾擾其旣多或喜能而好修寧安顯而獨裕顧阨窮而共愁惟知
心而難得斯一旦而爲收歲癸未而遷逐侶虫虵於海陬遇夫人
之來使闢公館而羅羞索微言於亂志發孤笑於羣憂物何深而

不考理何隱而不抽始參差以異序卒爛漫而同流何此權之不可恃遂駕馬而迴轡山嗷嗷其相軋樹蓊蓊其相樛雨浪浪其不止雲浩浩其常浮知來者之不可以數哀去此而無由倚郭郭而掩涕空盡日以遲留

愛而不見賦

蕭穎士

嗟乎或愛之而不見者有矣何必周秦異代夷夏殊軌阻嚴城之九重限方舟之一水苟時事之多怨故人遐而室邇關山起於足下堂上遠乎千里聳專專之目成遽時逝而復止詩人所以思婉變而搔首賦城隅之有侯吁不得其已也惟夙昔之良會夢佳期於北方歎渤海之三山吸流霞之景光含芳辭以賦予云好惠之不忘顧服義之末日陪遊嬉於帝鄉廣莫忽其飄怒鯨波洶而騰張俄驚魂以輟寐間窮髮之茫茫將揭厲以復從駛風濤之匪量顧投軀以靡吝撫遺體以兢惶晨切切以悽愴夕屏營以彷徨追前權之俯邇歎此恨之悠長於是收神返慮澄澹靜默冥然就寢

兀若無識異良宵之復遇希舊遊之可即徒有顧兮且未克憂沉深兮萃曾臆風兮雨兮何極

傷往賦并序

劉禹錫

人之所以取貴於輩走者情也而誕者以遺情為智豈至言耶予受室九年而鰥痛若人之天闕弗遂也作賦以傷之異夫覽者有以增伉儷之重云

歎獨處之邑邑兮憤伊人之我遺情可殺而猶毒境當懼而復悲人或朝嘆而暮息夫何越月而逾時太極運乎三辰轉寒暑而下馳有歸于無兮盛復于衰猶昧爽之必暮又安得而怨咨我今怨夫若人兮曾旭旦而潛暉飄零日及之萼倏忽蟬蛸之衣川走下而不還露迎陽而易晞恩已甚兮難絕見無期兮未思我行其野農民桑者舉按來鱸亦在林下我觀于途禪販之夫同荷均挈荆釵布襦羽毛之蕃鱗介之微和鳴灌叢雙沫漣漪薨薨者蟲蠢蠢伊豸遊空穴深兩兩相比何動類之萬殊必雄雌而與俱物莫失

儷以孤處我方踽踽而焉如我復虛室目淒涼兮心伊鬱心伊鬱
兮將語誰坐巨牀兮撫嬰兒何所丐沐兮何從仰飴襦袴在身兮
昔圍差跌鞶囊附臂兮餘馥歲蕤誠天性之潛感顧童心兮如疑
曉然有難繼之慕漠然減好弄之姿指遺桂兮能認愬空帷兮欲
歸我入寢宮痛人亡兮物改其容寶瑟僵兮絃柱絕瑤臺傾兮鏡
奩空寒爐委灰虛幌多風隙駟晨轉牕蟾夜通步搖昏兮網粘翡翠
芳褥掩兮塵化蛩蛩閱刀尺之餘澤見巾箱之故封翫服儼兮
猶具繁華謝兮焉從想翩翩於是非求僊宰與冥蒙信奇術之可
致嗟此生兮不逢徒注視以寂聽恍神疲而目窮還抱影以獨出
紛百哀而攻中系曰龍門風霜苦別鶴哀鳴夜銜羽吳江波浪深
雌劔一去無遺音悲之來兮憤予心洵如行波洊浸遙長緣情而
莫極思執禮以自箴已焉哉苒苒生死悠悠古今乘彼一氣兮聚
散相尋或鼓而興或罷而沉以無涯之情愛悼不駐之光陰諒自
迷其有分徒終怨於匪忱彼蒙莊兮何人予獨累嘆而長吟

夢渴賦

何諷

不宿食以晨飲困鍾盃以沉寢求春晝而高局墮幅巾而橫枕及
乎酒適衷腸神遊異方煙生喉舌悄然如狂爰瞰甃以窺汲諒不
任於呼吸俄據河而俯瀆乃器舟而杯斛倒魚鼈之窟宅見蛟龍
之委伏猶胃腸之不泐資宴飲而未足由是奔九江走五湖手不
暇於幹運心不息於躊躇見波漸竭而百川如綫岸益高而底淤
將枯腹慊爾而未覺肺燥然而不濡尋至大溟茫然連清豈爾浩
瀚而吾量不盈斟酌未幾倏見涯涘百靈稽首乞留濡旣吾腹未
充豈汝爲意俄傾竭於浩渺奄滴瀝而無清瑤宮貝闕盡列平地
三山赤城可以步至鯢鯨噉喙相煦以咽大鵬驚攫巨鼇愕眙四
顧燥涸悒然興情此情何竒非吾所知恨滄海之可罄不足充吾
之所思周遭有截塊然墜堞水府萬族咸呼帝闕帝且不聞吾欲
未竭方將尋蟻垤期耿恭問姜母以何在訪舒姑而欲從辨夸父
於渭上弔相如於臨邛萬計已盡六腑如燼窻日斜照飛蚊遶鬢

既驚覺山嘆可笑飲不盡器枯腸已瘠借頤沉吟其音逾涿以
吾此日之一夢見自古不足者之心

重校正唐文粹卷第九

淳熙四年冬十一月東雅堂繡梓

重校正唐文粹卷第十

吳興姚

鉉

纂

古調一摠一百四十六首

古今樂章一百三十六首

琴操一十首

古樂章

補樂歌十篇元結

補九夏歌系文九篇皮日休

今樂章

冬至日祀昊天圓丘樂章八首魏徵等作

開元樂章十九首張說

玄宗開元十三年封泰山祀天樂章十三首

正月上辛祈穀於南郊樂章三首褚亮

季秋享上帝於明堂樂章一首

祀五方上帝于五郊樂章二十首魏徵等作

祀朝日樂章三首貞觀中 祀夕月樂章三首貞觀中

睿宗太極元年登黃地祇於方丘樂章十一首盧從愿等

玄宗開元十三年禪社首山祭地祇樂章八首賀知章

登太社樂章三首魏徵等 享龍池樂章十首姚崇等作

享太廟樂章五首郭子儀等作 儀坤廟樂章九首徐彥伯等作

琴操十首韓愈

補樂歌十篇并序

元結

自伏羲氏至於殷室凡十代樂歌有其名亡其辭考之傳記其義或存焉嗚呼樂聲自太古始百世之後盡亡古音嗚呼樂歌自太古始百世之後遂亡古辭今國家追復純古列祀徃帝歲時薦享則必作樂而無雲門咸池韶夏之聲故探其名義以補之誠不足全化金石反正宮羽而或存之猶乙乙冥冥有純古之聲豈幾乎司樂君子導和焉爾凡十篇二十章各引其義以序之命曰補樂歌

網罟伏羲氏之樂歌也其義蓋稱伏羲能易人取禽獸之勞

吾人苦兮水深深網罟設兮水不深吾人苦兮山幽幽網罟設兮山不幽

右網罟二章章四句

豐年神農之樂歌也其義蓋稱神農教人種植之功

倚太帝兮其智如神分草實兮濟我生人倚太帝兮其功如天均四時兮成我豐年

右豐年二章章四句

雲門軒轅氏之樂歌也其義蓋言雲之出潤益萬物如帝之德無所不施

玄雲溶溶兮垂雨濛濛類我聖澤兮涵濡不窮黃雲漠漠兮含暎逾光邈我聖德兮溥被無方

右雲門二章章四句

九淵少昊氏之樂歌也其義蓋稱少昊之德淵然深遠

聖德至深兮齋齋如淵生類娛娛兮孰知其然

始許其反

右九淵一章章四句

五莖顛頊氏之樂歌也其義蓋稱顛頊得五德之根莖

植植萬物兮脩脩根莖五德涵柔兮颯颯房戎反而生其如何兮

袖似周反天下皆自我君兮化成

右五莖一章章七句

六英高辛氏之樂歌也其義蓋稱帝嚳能摠六合之英華

我有金石兮擊拊宗宗與汝歌舞兮上帝之風由六合兮英華颯

颯我有絲竹兮韻和泠泠與汝歌舞兮上帝之聲由六合兮根柢

羸羸

右六英二章章六句

咸池陶唐氏之樂歌也其義蓋稱堯德至大無不備全

元化油油兮孰知其然至德汨汨始沒兮順之以先元化泥泥唇

兮孰知其然至道泱泱兮由之以全

右咸池二章章四句

大韶有虞氏之樂歌也其義蓋稱帝舜能紹先聖之德

森森羣象兮日見生成欲聞朕初兮玄封冥冥洋洋至化兮日見

深柔欲聞涵濩兮大淵油油

右大韶二章章四句

大夏有夏氏之樂歌也其義蓋稱禹治水其功能大中國

茫茫下土兮乃生九州山有長岑兮川有深流茫茫下土兮乃均

四方國有民人兮野有封疆茫茫下土兮乃歌萬年上有茂功兮

下戴仁天

右大夏三章章四句

大護有殷氏之樂歌也其義蓋稱湯救天下護然得所

萬姓苦兮怨且哭不有聖人兮誰護育聖人生兮天下和萬物熙

熙兮舞且歌

右大護二章章四句

補九夏歌系文九篇并序

皮日休

周禮鍾師掌金奏九樂事以鍾鼓奏九夏按鄭康成注云夏者大也樂之大者歌有九也九夏者皆詩篇銘頌之類也此歌之大者載在乎樂章樂崩亦從而亡是以頌不能具也嗚呼吾觀之魯頌其古也亦以久矣九夏亡者吾能頌乎夫大樂既去至音不嗣頌於古不足以補亡頌於今不足以入用庸何頌乎頌之亡者俾千古之下鄭衛之內窈窕冥冥不獨有大卷音拳黃帝樂名之音者乎

王夏之歌者王出入之所奏也

燿燿皎日欸麗于天厥明御舒如王出焉燿燿皎日欸入于地厥晦厥貞如王入焉出有龍旂入有珩珮勿駘勿馳惟慎惟戒出有嘉謀入有內則繫彼臣庶欽王之式

王夏四章章四句

肆夏之歌者尸出入之所奏也

音愔清廟儀儀袞服我尸出矣迎神之穀杳杳陰竹坎坎路鼓我

尸入矣得神之祐

夏肆二章章四句

昭夏之歌者牲出入之所奏也

有鬱其鬯有儼其彝九變未作全乘來之既醑既酢爰棘音胤爰舞象物既降全乘之去

昭夏二章章四句

納夏之歌者四方賓客來之所奏也

麟之儀儀不繫不維樂德而至如賓之娛鳳之愉愉不箒不斂樂德而至如賓之娛自篴及管我有牢醑自篴及篴我有貨幣我牢不愆我貨不匱碩碩其才有樂而止

納夏四章章四句

章夏之歌者臣有功之所奏也

王有虎臣錫之鈇鉞征彼不愆一撲而滅王有虎臣錫之圭瓚征彼不享一烘而泮王有掌封追饋爾疆理王有掌客饋爾饗餼何

以樂之金石九奏何以賜之龍旂九旒去聲

章夏四章章四句

齊夏之歌者夫人祭之所奏也

璽璽衡筭翬翬禴自內而祭為君之則

齊夏一章章四句

族夏之歌者族人酌之所奏也

洪源誰孕疏為江河大塊孰挺播為山阿厥流浩漾厥勢嗟峨今

君之酌慰我實多

族夏二章章四句

祓夏之歌者賓出之所奏也

禮酒既酌嘉賓既厚牘為之奏禮酒既竭嘉賓既悅應為之節禮

酒既罄嘉賓既醒雅為之行饋應雅三樂器也實醉而出奏祓夏以此三器築地為之行事也

祓夏三章章三句

鷲夏之歌者公出入所奏也

相相其珪袞袞其衣出作二伯天子是毗相相其珪袞袞其服入作三孤國人是福

鷲夏二章章四句

冬至日祀旻天圓丘樂章八首魏徵褚亮虞世南等作

降神用豫和

上靈睠命膺會昌盛德殷薦叶辰良景福降兮聖德遠玄化穆兮天歷長

皇帝行用太和

穆穆我后道應千齡登三處大得一居貞禮惟崇德樂以和聲百神仰止天下文明

登歌奠玉帛用肅和

闔陽播氣甄曜垂明有赫圓宰深仁曲成日麗蒼壁煙開紫營聿遵虔享或降鴻禎

迎俎用雍和

欽惟大帝載仰皇穹始命田燭爰啓郊宮雲門駭聽雷鼓鳴空神其介祀景祚斯融

酌獻飲福用壽和

八音斯奏三獻畢陳寶祚惟永光輝日新

送文舞出迎武舞入用舒和

疊璧凝影皇壇路編珠流彩帝郊前已奏皇鍾歌大呂還符寶曆祚昌年

武舞作用凱安

昔在炎運終中華亂無象鄴郊赤鳥見邛山黑雲上大賚下周車禁暴開殷網幽明同叶贊鼎祚齊天壤

送神用豫和

歌奏畢兮禮獻終六龍馭兮神將昇明德感兮非黍稷降福簡兮祚休徵

開元樂章十九首

張說

迎神永和之樂三章

肅九室 諧八音 歌皇慕 動神心 禮宿設

樂妙尋 聲明格 裸奠臨 依玉几 御黼筵 聆愾息

律逐氣 音入玄 九韶遍 依玉几 御黼筵 聆愾息

優周旋 九韶遍 百福傳 聽和平 相百辟

信工祝 永頌聲 來祖考 帝孝成

皇帝行太和之樂一章

時文聖后 清廟肅雍 致誠勤孝 在貌思恭 玉節四夏

金鏘五鍾 繩繩雲步 穆穆天容

酌璿登歌肅和之樂一章

天子孝享 工歌溥將 躬裸鬱鬯 乃蕪管籥 臭以達陰

聲以求陽 奉時蒸嘗 永代不忘

迎俎雍和之樂二章

在滌嘉豢 麗碑敬牲 角握之牡 色純之駢 火傳陽燧

水漑陰精 太公胖俎 傳說和羹 既戒既平 鼓鍾管磬

齋戒豐潔 俎豆有馨 亦有和羹 既戒既平 鼓鍾管磬

肅唱和鳴 皇皇后祖 來我思成 酌獻用文舞一章

聖謨九德 真言五千 慶集昌胄 符開帝先 高文仗鉞

克配彼天 三宗握鏡 六合煥然 帝其承祀 率禮固愆

圖書霧出 日月清懸 舞形德類 詠諡功傳 黃龍蜿蜒

綵雲踳躩 五行氣順 八佾風宣 介此百福 於皇萬年

宣皇帝室光大之舞一章

肅肅藝祖 滔滔濬源 有雄玉劔 作鎮金門 文王餘緒

后稷謀孫 肇禋九廟 四海來尊 光皇帝室長發之舞一章

具禮崇德 備樂承風 魏推懂主 周贈司空 不行而至

無成有終 神與王業 天歸帝功 景皇帝室大政之舞一章

於赫元命 權輿帝文 天齊八柱 地半三分 宗廟觀德

笙鏞樂勳 封唐之兆 成天下君 元皇帝室大成之舞一章

帝舞季歷 襲聖生昌 后歌有媯 昭炎孕皇 天地合德

日月齊光 肅雍孝享 祚我萬方 高祖神堯皇帝室大明之舞一章

赤精亂德 四海困窮 黃旗舉義 三靈會同 早望春雨

雲披大風 溥天來祭 高祖之功 太宗文武聖皇帝室崇德之舞一章

皇合一德 廟宗百神 削平天下 大拯生民 上帝配食

單于入臣 戎歌陣舞 曄曄蒸蒸 高宗天皇大帝室鈞天之舞一章

高宗天皇大帝室鈞天之舞一章

高宗天皇大帝室鈞天之舞一章

高宗天皇大帝室鈞天之舞一章

高宗天皇大帝室鈞天之舞一章

高宗天皇大帝室鈞天之舞一章

高宗天皇大帝室鈞天之舞一章

高宗天皇大帝室鈞天之舞一章

高宗天皇大帝室鈞天之舞一章

高宗天皇大帝室鈞天之舞一章

高皇邁道 端拱無爲 化懷獯鬻 兵戢句驪 禮尊封禪
樂盛來儀 合位媧后 同稱伏羲

中宗孝和皇帝室文和之舞一章

退居江水 鬱起丹陵 禮物還舊 朝典中興 龍圖反及

駿命恭膺 鳴球香瓚 大禧是承

睿宗大聖真皇帝室景雲之舞一章

景雲霏爛 告我帝符 噫帝冲德 與天爲徒 笙鏞遙遠

俎豆虛無 春秋孝獻 因復此都

皇帝受福酒酢福和之樂一章

備禮用樂 崇親致尊 誠通慈降 敬徹愛存 獻懷稱壽

啐感承恩 皇帝孝德 子孫千億 大包天域 長亘不極

送文舞迎武舞一章

六鍾翕協六變成 八佾倘佯八風生 樂九韶兮人神感

美七德兮天地清

亞終獻武舞凱安之樂四章

毖彼瑤爵 亞維上公 室如屏氣 門不容躬 禮殷其本

樂執其中 聖皇所慕 天地幽通

禮币三獻 樂變九成 降循軒陛 仰歆皇情 福與仁合

德因孝明 百年神畏 四海風行

總總干戚 填填鼓鍾 奮揚增氣 坐作爲容 離若鷲鳥

合如戰龍 萬方觀德 肅肅雍雍

烈祖順三靈 文宗威四海 黃鉞誅羣盜 朱旗掃多罪

戢兵天下安 約法人心改 大哉干羽意 長見風雲在

撤豆登歌一章

止笙磬 撤豆籩 廓無響 宥又玄 主在室

神在天 情餘慕 禮罔愆 嘉黍稷 屢豐年

送神一章

眇嘉樂 援靈爽 感若未 思如往 休氣息

迴風上

返寂寞

還惚恍

懷虛駕

結空想

玄宗開元十三年封泰山祀天樂章一十二首

降神用豫和六變

夾鍾宮之一

欵泰壇

柴泰清

受天命

報天成

竦皇心

薦樂聲

志上達

歆下迎

夾鍾宮之二

億上帝

臨下庭

騎日月

陪列星

嘉視信

大禧馨

澹神心

醉皇靈

夾鍾宮之三

相百辟

貢八荒

九歌叙

萬舞翔

肅振振

繡皇皇

帝欣欣

福穰穰

黃鍾宮之四

高在上

道光明

物資始

德難名

承眷命

牧蒼生

寰宇謐

大階平

太簇徵之五

天道無親

至誠與鄰

山川遍禮

宮徵惟新

玉帛非盛

聰明會真

正斯一德

通乎百神

姑洗羽之六

饗帝饗親

維孝維聖

緝熙懿德

敷揚成命

華夷志同

笙鏞禮盛

明靈降止

感此誠敬

迎送皇帝用太和

孝敬中發

和容外彰

騰華照寓

如昇太陽

真璧就奠

玄靈垂光

禮樂具舉

濟濟洋洋

登歌奠玉帛用肅和羽調

奠祖配天

承天享帝

百靈咸秩

四海來祭

植我蒼璧

布我玄製

華日徘徊

神煙容稟

迎俎入用雍和

俎豆有秘 絜粢豐盛 亦有和羹 既戒既平 鼓鍾管磬

蕭唱和明 皇皇后祖 來我思成

酌獻用壽和

蒸蒸我后 享獻惟寅 躬酌鬱鬯 跪奠羽神 孝莫孝乎配

上帝於親 敬莫敬乎教天下為臣

皇帝飲福酒用壽和

皇祖嚴 配享皇天 皇降嘏 天子萬年

送文舞出迎武舞入用舒和商調

六鍾翕協六變成 八佾倘佯八風生 樂九韶兮人神感

美七德兮天地清

送神用豫和夾鍾宮調

禮樂終 禋燎上 懷靈惠 結皇想 歸風莊

迴天爽 百福來 衆神往 禋亮

正月上辛祈穀於南郊樂章三首

登歌奠玉帛用肅和

履艮斯繩 居中體正 龍運垂祉 昭符啓聖 式事嚴禋

聿懷嘉慶 惟帝求錫 時皇休命

迎俎用雍和

殷薦乘春 太壇臨曙 八簋盈和 六瑚登御 嘉稷匪歆

德馨斯飫 祝嘏無易 靈心有豫

送文舞出迎武舞入用舒和

玉帛犧牲申敬享 金絲戚羽盛音容 庶俾億齡提景福

長欣萬寓洽時邕

季秋享上帝於明堂樂章一首

送文舞出迎武舞入用舒和

御展合宮承寶歷 席圓重館奉明靈 偃武修文九圍泰

沈烽靜柝八荒寧

祀五方上帝于五郊樂章二十首 魏徵褚亮虞世南等作

祀皇帝降神宮音

黃中正位 含章居貞 既長六律 兼和五聲 畢陳萬舞 乃薦斯牲 神其下降 永祥休平

登歌奠玉帛用肅和

眇眇方輿 蒼蒼圓蓋 至哉樞紐 宅中圖大 氣調四序 風和萬籟 祚我明德 時雍道泰

迎俎用雍和

金縣夕肆 玉俎朝陳 饗薦黃道 芬流紫辰 迺誠迺敬 載享載禋 崇祀斯在 惟皇是賓

送文舞出迎武舞入用舒和

御徵乘宮出郊甸 安歌率舞遞將迎 自有雲門符帝賞 猶持雷鼓答天成

祀青帝降神用角音

鶴雲旦起 鳥星昏集 候啓新風 陽開初蟄 至德可饗

行潦斯挹 錫以無疆 蒸人乃粒

登歌奠玉帛用肅和

玄鳥司春 蒼龍登歲 節物變柳 光風轉蕙 瑤席降神 朱絃享帝 誠備祝嘏 禮殫珪幣

迎俎用雍和

大樂希音 至誠簡禮 文物斯建 聲名濟濟 六變有成 三登無體 迺眷豐絜 恩覃愷悌

送文舞出迎武舞入用舒和

笙歌籥舞 屬年韶鷺 鼓鳧鍾展 時豫調露 初迎綺春 節承雲遽 踐倉霄馭

祀赤帝降用徵音

青陽告謝 朱明戒序 咸長是祈 敬陳椒醕 博碩斯薦 笙鏞備舉 庶盡肅恭 非馨稷黍

登歌奠玉帛用肅和

離位克明 火中宵見 峯雲暮起 景風晨扇 木槿初榮
含桃可薦 芬馥百品 銷洋三變

迎俎用雍和

昭昭丹陸 弈弈炎方 禮陳牲幣 樂備篪簧 瓊羞溢俎
王齊浮觴 恭惟正直 歆此馨香

送文舞出迎武舞入用舒和

千里温風飄絳羽 十枚炎景勝朱干 陳觴薦俎歌三獻
拊石縱金會七盤

祝白帝降神用商音

白藏應節 天高氣清 歲功既阜 庶類收成 萬方靜謐
九土和平 馨香是薦 受昨聰明

登歌奠玉帛用肅和

金行在節 素靈居正 氣肅霜嚴 林凋草勁 豺祭隼擊
潦收川鏡 九穀已登 千箱流詠

迎俎用雍和

律應西成 氣躔南呂 珪幣咸列 笙竿備舉 苾苾蘭羞
芬芬桂醑 式資宴貺 用調霜序

送文舞出迎武舞入用舒和

璿儀氣爽驚緹籥 玉呂灰飛含素商 鳴鞀奏管芳羞薦
會舞安歌葆眊揚

祝黑帝降神用羽音

嚴冬季月 星迴風厲 享祀報功 方祈來歲
登歌奠玉帛用舒和

律周玉琯 星回金度 次極陽烏 紀窮陰兔 火林霰雪
湯泉凝沍 八蜡已登 三農息務

迎俎用雍和

陽月斯紀 應鍾在候 載潔牲牲 爰登俎豆 既高既遠
無聲無臭 靜言恪思 惟神保佑

送文舞出迎武舞入用舒和

執籥持羽初終曲

朱于玉戚始分行

七德九功咸已暢

明靈降福具穰穰

祀朝日樂章三首

貞觀中作

登歌奠玉帛用肅和

惟聖格天

惟明響日

帝郊肆類

王宮戒吉

珪奠春舒

鍾歌曉溢

禮云克備

斯文有秩

迎神用雍和

晨儀式薦

明祀惟光

神物爰止

靈暉載陽

玄端肅事

紫幄與祥

福履攸假

於昭令王

送文舞出迎武舞入用舒和

崇牙樹羽延調露

旋宮扣律掩承雲

誕敷懿德昭神武

載集豐功表睿文

祀夕月樂章三首貞觀中作

登歌奠玉帛用舒和

測妙為神

通微曰聖

坎祀貽則

郊禋展敬

璧薦登光

金歌動映

以載嘉德

以流曾慶

迎俎用雍和

肅晨爭舉

天宗禮闕

夜典涼秋

陰明湛夕

有齊斯旨

有牲斯碩

穆穆其暉

穰穰是積

送文舞出迎武舞入用豫和

合吹八風金奏動

分容萬舞玉鞘驚

辭昭茂典光前烈

夕曜成功表舊明

睿宗太極元年登黃地祇於方丘樂章十一首

林鍾商

太樂和暢

殷薦明神

一降通感

八變必臻

有求斯應

無德不親

降靈醉止

休徵萬人

太簇角

盧從愿

坤元載物 陽樂發生 播殖資始 品彙咸亨 別俎某布
方壇砥平 神歆禋祝 后德惟明

姑洗徵

劉冕

大君出震 有事郊禋 齋戒既肅 馨香畢陳 樂和禮備
候暖風春 恭惟降福 實賴明神

南呂羽

韓休

於穆濬哲 維清緝熙 肅事昭配 永言孝思 滌濯靜嘉
馨香在茲 神之聽之 用受福釐

皇帝行用太和 黃鍾宮

王皎

於穆聖皇 六葉重光 太原刻頌 后土疏場 寶鼎呈符
敲雲孕祥 禮樂備矣 降福穰穰

登歌奠王帛用肅和 蕤賓均之夾鍾羽

崔文同

聿脩嚴配 展事禋宗 祥符寶鼎 禮備黃琮 祝辭以信
明德惟聰 介茲景福 永永無窮

登俎用雍和 黃鍾均之南宮羽

賈魯

蠲我漸穡 潔我粢薺 有豆孔碩 爲羞既臧 至誠無昧
精意惟芳 神其醉止 欣欣樂康

酌獻飲福用壽和

禮物斯具 樂章乃陳 誰其作主 皇考聖真 對越在天
聖明佐神 宥然分汾 厚澤如春

送文舞出迎武舞入用舒和 太簇宮 何鸞

樂奏云闋 禮章載虔 禋宗于地 昭嘏于天 惟馨薦矣
既醉歆焉 神之降福 永永萬年

武舞用凱安 黃鍾均之林鍾徵 蔣挺

維歲之吉 維辰之良 聖君紱冕 肅事壇場 大禮已備
大樂斯張 神其醉止 降福無疆

送神用順和 源光裕

方丘既膳 嘉饗載溢 齋敬畢誠 陶匏貴質 秀簋豐薦

芳俎盈實 永永福流 其昇如日

玄宗開元十三年禪社首山祭地祇樂章八首 賀知章

迎神用順和

至哉合柔德 萬物資以生 恒順稱厚載 流謙通變盈
聖心事能察 增廣陳厥誠 黃祇優如在 泰折俟咸亨

皇帝行用太和

肅我成命 於昭黃祇 裘冕而祀 陟降在斯 五音克備
八變聿施 緝熙肆靖 厥心匪離

登歌奠玉帛用肅和

黃祇是祇 我其夙夜 寅畏誠潔 匪遑寧舍 禮以琮玉
薦厥茅藉 念茲降康 胡寧克暇

迎俎用雍和

夙夜有密 不敢寧宴 五齊既陳 八音在縣 粢盛以絜
房俎斯薦 明德惟馨 尚茲克禴

皇帝初獻用壽和

惟以明發 有懷載殷 樂盈而返 禮順其禋 立清以獻
薦欲是親 於穆不已 哀對斯臻

皇帝飲福用福和

穆穆天子 告成岱宗 大裘如濡 執珽有顙 樂以平志
禮以和容 上帝臨我 云胡肅邕

皇帝還宮用太和

昭昭有唐 天卑萬國 列祖應命 四宗順則 申錫無疆
宗我同德 曾孫繼緒 享神配極

送神用靈具醉 代順和

源乾曜

靈具醉

杳熙熙

靈將往

眇禋禋

顧明德

吐正辭

爛遺光

流禎祺

登太社樂章三首

魏徵褚亮虞世南等作

登歌奠玉帛用肅和

后土凝德 神功叶契 九域底平 兩儀交際 戊期應序
陰墉展幣 靈車少留 俯歆樽桂

迎俎用雍和

美報崇本 嚴恭展事 受露流壇 承風啓地 絜粢登俎

醇犧入饋 介福遠流 羣生畢遂

送文舞出迎武舞入用舒和

神道發生敷九稼 陰陽乘仁暢八埏 緯武經文陶景化

登祥薦祉啓豐年

享龍池樂章十首

姚崇

第一章

恭聞帝里生靈祉 應報明君鼎業新 旣叶翠泉光寶命 還符白水出貞人 當時舜海潛龍躍 此日堯河帶馬巡 獨有前河一小鴈 叨承舊惠入天津

第二章

帝宅王家大道邊 神馬潛龍涌聖泉 昔日昔時經此地 看來看去漸成川 歌臺舞榭宜正月 柳岸梅洲勝往年 莫疑波上春雲少 祇爲龍飛直上天

第三章

沈佺期

龍池躍龍龍已飛 龍德光天天不違 池開天漢分皇道 龍向天門入紫微 邸第樓臺多氣色 君王鳧鴈有光輝 爲報寰中百川水 來朝上地莫東歸

第四章

代邸東南龍或躍 泉清碧浪遠浮天 樓臺影就波中出 日月光疑鏡裏懸 鴈沼迴流成舜海 龜書薦祉應堯年 大川旣濟慙爲楫 報德空思奉細涓

第五章

姜皎

龍池初此出 龍山常經此地 謁龍顏 日日芙蓉生 夏水年年楊柳 變春灣 堯壇寶匣餘煙霧 舜海漁舟尚往還 願以飄飄五色影 從

李朴

來從去九天間

第六章

龍興白水漢興符聖主時乘運斗樞岸上葦葦五花樹波中的
鑠千金珠慘環昔聞迎夏啓發匣先來瑞有虞風色雲光隨隱見赤
雲神化象江湖

第七章

蘇頌

西京鳳邸躍龍泉佳氣休光鍾在天軒后霧圓今已得秦王水劍
昔當傳恩魚不似昆明釣瑞鶴長如太液仙願侍巡遊同舊里更
聞蕭鼓濟樓船

第八章

李乂

星分邑里四人居水洑源流萬頃餘魏國君王秤象處晉家蕃邸
化龍初青蒲似騁遊梁馬綠藻疑游宴鎬魚自有神靈滋液地年
年雲物史官書

第九章

姜晞

靈沼綦迴邸第前浴日涵春寫曙天始見龍臺昇鳳闕應如霄漢
起神泉石匱渚傍還啓聖桃李初生更有仙欲化帝圖從此受正
同河變一千年

第十章

乾坤啓聖吐龍泉泉水年年勝一年始看魚躍方成海即覩龍飛
利在天洲渚遙將銀漢接樓臺直與紫微連休氣榮光恒不散懸
知此地是神仙

享太廟樂章五首

玄宗至道大聖大明孝皇帝室奠獻用廣運之舞一章

郭子儀

於赫皇祖昭明有融惟文之德惟武之功河海靜謐車書混同虔
恭孝饗穆穆玄風

肅宗文明武德大聖大宣孝皇帝室奠獻用惟新之舞

一章

劉晏

漢運惟永神功中興風駟氛禊天覆黎蒸三光再朗庶績其凝重
熙累葉景命是膺

代宗睿文孝武皇帝室奠獻用保大之舞一章

郭子儀

於穆文考聖神昭彰蕭勺羣慝含光遠方萬物茂遂九夷賓王悃
悃雲韶德音不忘

德宗神武孝文皇帝室奠獻用文明之舞一章 鄭綱

於穆時文受天明命允恭玄默化成理定出震嗣德應乾傳聖猗
歟緝熙千億流慶

憲宗聖神章武孝皇帝室奠獻用象之舞一章

段文昌

肅肅清廟登顯至德澤周八荒兵定四極生物咸遂羣盜滅息明
聖繼承子孫千億

儀坤廟樂章九首

迎神用中和 林鍾宮

徐彥伯

倚若清廟肅肅熒熒國薦嚴祀坤興淑靈有凡在室有樂在庭臨
茲孝享百祿惟寧

皇帝行用太和 黃鍾宮

丘悅

孝哉我后冲乎迺聖道映重華德輝文命慕深視篋情殷撫鏡萬
國移風兆人承慶

酌獻登歌用肅和 中呂均之大簇 張齊賢

標圭旣濯鬱鬯旣陳畫翬雲舉黃流土醇儀充獻酌禮盛衆裡地
察惟孝愉焉饗親

迎俎用雍和 林鍾宮

薛稷

陽靈配德陰魄昭升堯壇鳳下漢室龍興倪天作對前旒是凝化
行南國道盛西陵造舟集灌無德而稱我柔旣潔我醴旣澄陰陽
靈廟光靈若憑德馨惟饗孝思蒸蒸

昭成皇后室酌用坤貞

我後人我祖在上四方在下厥臨孔威敢戲以侮孰荒于門孰治于田四海既均越裳是臣

拘幽操

目窈窕兮其疑其盲耳肅肅兮聽不聞聲朝不日出兮夜不見月與星有知無知兮爲死爲生嗚呼臣罪當誅兮天王聖明

岐山操

我家于函自我先公伊我承序敢有不同今狄之人將土我疆民爲我戰誰使死傷彼岐有岨我往獨處爾莫余追無思我悲

履霜操

父兮兒寒母兮兒飢兒罪當咎逐兒何爲兒在中野以宿以處四無人聲誰與兒語兒寒何衣兒飢何食兒行于野履霜以足毋生衆兒有母憐之獨無母憐兒寧不悲

雉朝飛操

雉之飛于朝日羣雌孤雄意氣橫出當東而西當啄而飛隨飛隨

啄羣雌粥粥嗟我雖人曾不如彼雉雞生身七十年無一妾與妃

別鵠操

雄鵠銜枝來雌鵠啄泥歸巢成不生子大義當乖離江漢水之大鵠身鳥之微更無相逢日且可繞樹相隨飛

殘形操

有獸維狸兮我夢得之其身孔明兮而頭不知吉凶何爲兮覺坐而思巫咸上天兮識者其誰

重校正唐文粹卷第十

重校正唐文粹卷第十一

古調乙摠四十六首

吳興姚

鉉

纂

楚騷體十一

九諷

并系述

皮日休

反招魂并序

悼賈

并序

效古詩三十五

江有楓一篇

蕭穎士

菊榮五章

有竹一篇

蟬鳴五章

宋華

涼雨一篇

蕭穎士

虞獲子鹿一篇

韋應物

上古之什補亡訓傳十三章

顧況

悼彼我系一首

王勃

元和聖德詩一首

韓愈

鄆州溪堂詩一首

漢隄詩一首

盧肇

有所恨二章

歐陽詹

河之水二章

韓愈

九諷系述 并序

皮日休

昔在屈平既故作離騷經正詭俗而為九歌辨窮愁而為九章是後詞人撫而為之皆所以嗜其麗詞擅其逸藻者也至若宋王之九辨王褒之九懷劉向之九歎王逸之九思其為清怨素豔幽快古秀皆得芝蘭之芬芳鸞鳳之毛羽也然自原已降繼而作者皆相去數百祀足知其文難述其辭罕繼者矣大凡有文人不擇難易皆出於毫端者乃大作者也楊雄之文丘軻乎而有廣騷也梁竦之辭班馬乎而有悼騷也又不知王逸奚罪其文不以二家之述為離騷之兩派也昔者聖賢不偶命必著書以見志況斯文之怨抑歟噫吾之道不為不明吾之命未為不偶而見志斯文者吾懼來世任臣之君因謗而去賢持祿之士以猜而遠德故復嗣數賢之作以九為數命之為九諷焉嗚呼百世之下復有修離騷章句者乎則吾之文未過不為乎廣騷悼騷也

容而莫顧前誨行兮後止高諭仰兮下俯咸為吾之儼為愚兮並以吾之靈為僂羌靈脩之乃吾知兮先職我而為輔奈其臣之信信兮及不知吾之所撫吾欲以明詰之性辨君臣之分兮定文物之數吾欲以正訐之道兮進忠賢而退姦豎吾欲以醇醲之化兮反當今而為往古吾欲以忖度之志兮定觚圓而反規矩念僂覈之在位兮若梟羊之當路內灼怛以如傳兮復何知其所想乃指天而鬱悠兮將天奪乎國祐永怒怒以何言兮將求知其吾祖

正俗

有昉兮點而謂之不絜有泉兮壅而謂之不決有莛兮輶而謂之不芳有軸兮輳而謂之不轍聲喧壑遠啼以無音兮氣鬱悒而空咽既怒怒以增懼兮又謾謾漫而不訣誣彭祖以為孺兮譎湯子以為羞夥眾人之難信兮擗夸者之不悅佞為疵兮何去姦為疣兮莫副諧讟為轡兮莫御謗為玉兮何切彘既臙而必烹兮木方爨坳兮必折心轆轤而似車兮思縣縣而如跌手欲動兮似拳

足將行兮如綫既不辨其顏距兮遂一貫於堯桀吾哀生之不遲
兮奚至死而惓惓念帝座之不燼地朗兮故交光於卷舌既何路
以自辨兮遂沒齒而瘳刺

遇謗

靳尚之言兮美如嬪子蘭之氣兮醜於醒既怒聯緝以相向兮遂
裹足而南征面懼懼以美色心慄慄以何情耳方聰兮忽睽目正
視兮忽盲目當午兮便昃天方晝兮不明欲泣兮有血將啼兮失
聲望靈脩兮似失出國門兮若驚軻識怨兮亦緩駟知愁兮復鳴
既徜徉兮夏水復眷戀兮南荆嗟余夙秉於大訓兮涵清骨之忠
貞既貿貿者之莫予容兮向重蒼而自盟既憚地南仁以憑義兮
遂鈇信而規規誠將真宰之不仁兮胡為役余以此生彼鸞斯之
有賊兮固不能容乎鶴鷓彼茨菴之叢穢兮固不能讓乎杜蘅已
矣乎國無人兮莫我留將訴帝于王京

見逐

荷為稠切兮芟為襍碑荃為穢地勿兮薜為禕弭吾棹兮灋之
浦駐吾楫兮湘之湄悲莫悲兮新去國怨莫怨兮新相思幽篁蕭
兮靜晚清漪澹兮去遲湘君欲出兮風水急帝子不來兮煙雨微
芷既老兮白葍地日將暮兮紅菱朝浮乎鷓鴣啼夕叫乎羈雌
搔禮漾漾兮不止黃悠悠兮何之日出沒兮北渚雲依倚兮九
疑既無人以辯余兮又何心而怨咨退不解其恫恫吐音兮進
不知其忸怩寒蛸怨而無聲兮古木悽其寡枝嗟吾鬼之不反兮
千秋萬歲湘中馳

悲遊

慨天道之不明兮何獨生此大佞若麋鳩八瑜之能冠兮當一國
而持柄見舌臣之反詐兮信其主以不競轍已覆而又遵兮佗鈕
切將翻而不整不思心腹之疾兮又玩膏肓之病竟客死於咸陽
兮終不作毒王之幸既養地胡以為患兮遂倒軒以授柄將
諛臣以肆禍兮豈上天之付命粵吾大以為不可兮彼以災而為

慶儻靈均之鬼有知兮刷吾恥於下暝

憫邪

有美一人兮端憂千喑
萬愁兮曾不得以少休
腸結多以莫迴兮淚啼極而不流
王孫何處兮碧草極目公子不來兮清湘滿樓
汀邊月色兮曉將曉浦上蘆花兮秋復秋天
沈寥以似淬兮峯巉崿以如抽
篔簹颯兮兩岸杜若死兮霜洲遺余程兮澧之側
整余陌兮湘之幽望女嬃兮秭歸夢懷宋玉兮荆門
愁欲向天以號咷兮寸晷不可以少留
又不知吾魄所處兮求冥冥以悠悠

端憂

山之巔兮水之涘桂為祠兮蘭為祀
執玉梓兮扣雷鼓奠金盃兮滴浮蟻
薦瓊芳兮望暮雲獻椒醕兮拜寒水
祝彤蠻以怪談兮巫妖冶而魅醉
波閃倏兮湘君竹蕭疎兮帝子日將暮
兮河伯秋正深兮山鬼神之化兮何方
人之艱兮至此胡不化其邪而為正兮
胡不反其戾而為義胡不轉其亡而為興
兮胡不易其亂而為治

但血食於下國兮罪不少禪於有位
吾將乘青螭而駕白蚪兮謁帝而訴
神之累請天弧發鏃兮天扈行筆神速
悔尤兮俾吾靈脩而易志

紀祀

粵吾秉志兮繫於瑾瑜芬其德而芳其道
兮榮於薜蘿將興國以見罪兮擬佐王而蒙辜
彼羣小之茸茸兮如慕臭之鼈蟬以大鵬為爵
兮以康瓠為觥以袞衣為襟兮以黎丘為墟
以鄭姬為醜兮以子產為愚以鮑焦為貪
兮以孔聖為巫吾將奮鱗於大空兮奚獨慕此
江湖吾將發榮於蟠桃兮奚獨守此蒿蕪
吾將蕩其魄兮駢風軻與軋車謁帝於冥冥
之天兮秉其生殺之樞將飄飄以為逝兮亦何必懷此佞邪之故都

捨慕

堯死兮舜滅禹殄兮湯絕似玉兮將沈如金
兮求沒行以仁兮止以義生以貞兮死以絜
念余曾不足以蹈聖圃兮亦慕茲而自悅

湘浦兮煙深沅江兮風切顧影兮自憐撫躬兮永訣鬼慘兮神悲
雨泣兮泉咽竟汨沒以奔淪兮未幽憂而怫鬱湘之山兮未盡湘
之流兮不竭千秋兮愁雲萬古兮明月靈均之冤兮孰能銷其氣
靈均之愁兮孰能釋其結來者之自鑒兮無致位於牙孽

絜死

反招魂 并序

屈原作大招魂疑曰景暉作宋玉作招魂皮子以爲忠放不如守
介而死奚招魂爲故作反招魂一篇以辨之辭曰

承溟滓之命兮付余才而輔君君旣不得乎志兮余飄飄而播遷
余蕩大空而就滅兮君又招余俾復身余詣帝以請訣兮帝俾巫
陽以筮云巫陽語余以不可歸兮故作詞以招君乃下招曰余君
兮歸來故都慎不可留些其君雄虺兮其民封狐些食民之肝鬲
以爲其肉兮摘民之髮膚以爲其衣些朝刀鋸而暮鼎鑊兮上睽
昧而下墨眉尿癡些君兮歸來故都慎不可留些余昔爲比干之

魄兮干僂而余去些未聞于貪生以自招兮余竟終其所處些君
兮歸來故都慎不可留些余昔爲伍胥之魄兮胥僂而余逝些未
聞胥貪位以惜生兮執屬鏹而不滯些君兮歸來故都慎不可留
些余昔爲弘演之魂兮演自殘而余行些余未聞演惜余以不死
兮俾其義而益明些君兮歸來故都慎不可留些帝命余以輔君
兮亦以君之忠介些今以忠而見聞兮尚盤桓而有待些將自富
貴而入羈旅兮其志乃悔些將戀骨肉而惜家族兮何不自裁些
梟食母而鏡食父兮見禽獸之爲生些苟殛殘者眉壽兮實梟鏡
而同名些君乎慎勿懷故都之戀歸來乎余爲君存千古忠烈之
榮枯些

悼賈 并序

余嘗讀賈誼新書見其經濟之道真命世王佐之才也自漢氏革
羸高祖得於矢石不暇延儒人及爲天子制缺度弛處華而夷是
時獨有叔孫生能定朝儀其制未悉唯生草其書欲以制屈諸侯

推定正朔調革輿服通流貨幣天不祐漢絳灌興謗竟枉其道出
傳湘沅生自以不得志哀屈平之放逐及渡湘沈文以弔之故其
辭曰騶摛九州而相君兮何必懷此故都噫余釋生之意矣當戰
國時屈平不用於荆則有齊趙秦魏矣何不捨荆而相他國乎余
謂平雖遭靳尚子蘭之讒不忍捨同姓之邦爲他國之相宜矣然
則生之見棄又甚於平當漢時捨文帝則諸侯矣如適諸侯則新
書之文抑諸侯而尊天子也捨諸侯則胡越矣則新書之文滅胡
越而崇中夏也是以其心切其憤深其詞隱而麗其藻傷而雅余
悲生哀平之見棄又生不能自明其道嗚呼聖賢之文與道也求
知與用苟不在於一時而在於百世之後者乎其生之哀平歟余
之悲生歟吾之道也廢與用幸未可知但不知百世之後得其文
而存之者復何人也咸通癸未中南浮至沅湘復沈文以悼之其

辭曰

粵炎緒之媯縣兮其國度之未彰天錫生以命理兮異其道之益

光偉吳公之知賢兮道其名於文皇既軫月啟軫以召之兮遂位
之於上庠愍耄儒之蠢愚兮對天問之不臧既羣儒之讓俊兮馳
其譽之煌煌嗟大漢之丕緒兮蚪其賢於汗潢上下溷而不分兮
議制削於驕王殺僂勞而不制兮斷粹胡與寇攘羌虜塗以侵華
兮曾不能以抑強餌其嗜之延延兮寔三代之計良念五德之更
承兮論臚結而不綱乃秉臆以興說兮數用五而色尚黃又諸侯
以開國兮輸其租於咸陽曾不得以撫民兮俾其君兮何忘請紆
綬以乘印兮各馳化於所疆上旣悅而欲大用兮遭絳灌與東陽
道旣擯兮何明乃出傳於沅湘浮沅波之翕沍兮或漾棹以夷猶
望靈均之沒所兮顧頹其心之怊怊馭臨汨羅之浩漾兮想懷沙
之幽憂森穆羅以翁鬱兮時迸欬以相號霧雨暗乎北渚蝸蠅毒
乎芳洲景黯沮以不明兮若天悼乎離騷香依依兮杜若韻淒淒
兮簞筲山隱隱以掃空兮煙微微而淡秋羌吾不知所感兮淚愴
恨以橫流當抱蠶於渺瀟兮曾無足以少休旣菴蘼以傷思兮又

鶴鷓以動愁嗚呼哀哉世既不平領吾道以爲非兮吾復何依頻
蘭憔悴兮根莠繁滋麟鳳匿迹兮梟獍騰威憤匠罷斧兮拙者構
之離婁閉目兮瞽者揚眉子都蒙袂兮敦洽聘姿嗚呼哀哉亦先
生之尤也胎軀其世之不可兮何不解而去位又垂萬世之名取
捨在此奚自謗於童殺兮乃憫然而爲累蓋伊尹三就五就之心
兮冀其民之可治奈惛惛以不悟兮又被之以非議幸一人之再
覺兮答受釐之與義既辱辱王以墮駕兮乃寃慟而已矣訊曰君不
明兮莫我知幽都寂兮和涕歸文懸日月兮俟後聖用之大故忽
兮其何足悲

江有楓一篇十章并序

蕭穎士

江有楓思陸鄭二友吳會舊遊且疾讒也君宦于尹府以直方不
偶見偏讒佞惟古之賢者有避色避言之義矯然去之二室之間
有械樹焉與江南楓形胥類憩於其下而作是詩以貽夫二三子
焉

江有楓其葉蒙蒙我友自東于以遊從山有械其葉漠漠我友徂
北于以休息想彼械矣亦類其楓矧伊懷人而忘于東東可遊矣
會之丘矣于山于水于廟于寺于亭于里君子遊焉于以宴喜其
樂亶亶粵東可居彼吳之墟有田有庭有朋有書有尊有魚君子
居焉惟以宴醑其樂徐徐我朋在矣彼陸之子彼陸之子如松如杞
淑問不已我友于征彼鄭之子彼鄭之子如瑋如英德音孔明我思
震澤萋萋幕幕寤寐如覲我思剡谿杉篠萋萋寤寐無迷有鳥有
鳥粵鷗與鷺浮湍戲渚皓然絜素忘其猜如彼何人斯曾足傷懼
此懼維何懼寘于羅彼驕者子讒言孔多我聞先師體命委和公
伯之懇則如予何悵然山河惟以嘯歌其憂也哉

菊榮一篇五章并序

菊榮酬贈離且申志也久寓大邑賢宰宋侯惠而好予賦鳴蟬以
貺別有懷相規備厥卒章于以報焉

采采者菊芬其榮斯紫英黃萼照灼丹墀愷悌君子佩服攸宜王

國是維大君是毗

宋即太孫文貽爾子孫百祿萃之

采采者菊于邑之城舊根新莖布葉垂英彼美淑人應家之禎有

弦既鳴我政則平宜爾棟崇必復其慶

采采者菊于邦之府陰槐翳柳邇楹近宇彼勞者子喧卑是處慨

其莫知蘊結誰語企彼高人色斯遐舉

采采者菊于賓之館既低其枝又弱其幹有匪君子是焉披翫良

辰旨酒宴飲無筭愴其化別終然永歎

歲方宴矣霜露殘促誰其榮斯有英者菊豈微春華懿此貞色人

之侮我混于薪棘詩人有言好是正直

有竹懿李新後閣而讌親友也

有竹斯竿于閣之前君子秉心惟其貞堅兮有竿斯竹于閣之側

君子秉操惟其正直兮彼蔚者竹蕭其森矣有開者閣宛其深矣

迴簷幽砌如翼如齒冬之宵霰雪斯漉我有金鑪煴其以歆夏之

日炎景斯鬱我有珍簟淒其以栗彼紛者務休其豫矣有旨者酒

歡其且矣友僚萃止跼萼載鞞彼美公之姓兮那歟應積慶兮期

子惟去之柄兮

蟬鳴一篇五章并序

蟬鳴感秋興送將歸也僻守外邑而蘭陵子相過詰朝言歸賦詩

見志以申贈焉

蟬其鳴矣于彼踈桐庇影容跡何往不容嘒嘒其長水託于風未

見君子我心忡忡既見君子樂且有融

彼蟬鳴矣于林之表含風飲露以樂吾道有懷載遷伊誰云保未

見君子我心情悄既見君子披豁予抱

蟬鳴蟬鳴幽暢乎而蕭蕭爾庭遠近涼颼言赴高柳叢篁間之思

而不見如渴如飢亦既觀止我心則夷

蟬鳴伊何時運未與匪歎秋徂怨斯路阻願言莫從鬱悒誰語君

子至止慰我延佇何斯違斯倏邇遐舉

歲之秋深蟬其夕吟披衣軒除蕭蕭風林我友來斯言告離衿何以叙懷臨水鳴琴何以贈言委順浮沈

涼雨一章并序

蕭穎士

涼雨志楊侯樂賓僚也

習習涼雨泠泠浮颺君子樂胥于其賓僚有女斯天式歌且謠歡言終宵惟以招邀于胥樂兮

虞獲子鹿一篇并序

韋應物

虞獲子鹿憫園鹿也遭虞之機張見畜於人不得遂其天性焉虞獲子鹿畜之城陬園有美草池有清流但見蹙蹙亦聞呦呦誰知其思巖谷之游

上古之什補亡訓傳十三章

顧況

上古敏農也

遐哉上古生棄與柱勾龍氏主乃有甫田惟彼甫田有萬斯年開利之源無乃塞源一廛亦官百廛亦官嗚呼孔艱浸兮嘆兮申有

蚤蝨兮惟馨祀是患豈止餒與寒嗇夫咨咨稊盛苗衰耕之穰穰鋤犁手胼足胝水之蛭蝻吮喋我肌我姑自思胡不奮飛東人利百西人利百有匪我心胡為不易河水活活萬人逐末俾爾之愉快兮

上古一章

左車憑險也

震為雷兄長之左東方之師也憑險不已君子憂心而作是詩

左車有慶萬人猶病曷何去之于黨孔盛敏爾之生胡為波迸左車有赫萬人毒螫曷可去之于黨孔碩敏爾之生胡為草戚

左車二章

築城刺臨戎也寺人臨戎以墓塋為城壁

築城登登于以作固咨爾寺兮發郊外冢墓死而無知猶或不可若其有知惟上帝是愬

築城弈弈于以固敵咨爾寺兮發郊外冢窟死而無知猶或不可若其有知惟上帝是謫

築城二章

持斧啓戎士也戎士伐松柏爲蒸薪孝子徘徊而作是詩
持斧持斧無翦我松柏兮

持斧一章

十月之郊造公室也君子居公室當思布德行化焉

十月之郊羣木肇生陽潛地中舒達勾萌暄其蔚兮不可以遊息
乃爚蒺藜乃夷荆棘乃繇彼曲直匠氏度思登斧以時澤梁蓁蓁
無或夭枝有巨根蒂生混茫際呼吸羣籟萬人揮斤坎坎有厲陸
遷水濟百力殫弊審方面勢姑博其製作爲公室公室旣成禦燥
濕風日棟之斯厚榱之斯密如翼于飛如鱗櫛比繚以周墉城以
崇階俯而望之蠹與雲齊礪砮砮砮藻并旋題丹素之燥兮椒桂
之馥兮高閣高閣珠綴結絡金鋪爛若不集于鳥雀繪事告畢賓
筵秩秩乃命旨酒琴瑟琴瑟在堂莫不靜謐周環掩闥仰不漏日
冬日嚴凝言納其陽和風載昇夏日鬱蒸言用干陰涼風颯興有

匪君子自賢不已乃夢乘舟乃夢乘車夢人占之更爽其居炎炎
則移皎皎則虧木實之繁兮明年息枝爰處若思胡寧不爾思

十月之郊一章

燕于巢審日辰也燕不以甲乙銜泥

燕燕于巢綴葺維戊甲兮乙兮不宜有謬飛龍在天雲掩于斗曷
日于雨乃曰庚午彼日之差亦孔斯醜昔在羲和酒淫不修我筮
我龜莫我告繇胤迺征之彞倫九疇君子授律是禡是禴三五不
備罔克攸遂惠此蒸人母廢爾事爾莫我從維來者是翼

燕于巢一章

蘇方諷商胡舶舟運蘇方歲發扶南林邑至齊國立盡

蘇方之赤在胡之舶其利乃博我土曠兮我居闡兮我衣不白兮
朱紫爛兮傳瑞擘兮相唐虞之維百兮

蘇方一章

陵霜之華傷不實也

陵霜之華我心憂嗟陰之勝矣而陽不加塊軋陶鈞乃帝乃神乃舒乃屯烈烈嚴秋熙熙陽春職生有倫今華發非其辰辰屬東方之仁遐想三五黃帝登雲堯年百餘二儀分位六氣不渝二景如璧五星如珠陵霜之華兮何不妄敷

陵霜之華一章

田哀閩也

田音寒閩俗呼子為田父為郎罷

田生閩方閩吏得之乃絕其陽為臧為獲致金滿屋為髡為鉗如視草木天道無知我罹其毒神道無知彼受其福郎罷別田吾悔生汝及汝既生人勸不舉不從人言果獲是苦田別郎罷心摧血下隔地絕天及至黃泉不得在郎罷前

田一章

我行自東不遑居也

我行自東山海其空旅棘有叢我行自西壘與雲齊雨雪淒淒我行自南烈火滿林日中無禽霧雨淫淫我行自北燭龍寡色何枉

不直我憂京京何道不行兮

我行自東一章

採蠟怨奢也荒巖之間有以續蒙其身腰藤造險及有羣蜂肆毒哀呼不應則上捨藤而下沈壑

採採者蠟于泉谷兮煌煌中堂烈華燭兮新歌善舞弦柱促兮荒巖之人自取其毒兮

採蠟一章

倬彼我系一首

王勃兄勵序

倬彼我系舍弟號州叅軍勃所作也傷迫乎家貧道未成而受祿不得如古之君子四十強而仕也故本其情性源其事業因陳先人之迹以議出處致天爵之艱難也

倬彼我系出自有周分疆錫社派別枝流居衛仕宋匡羸相劉迺武迺文或公或侯

晉曆崩坼衣冠擾弊粵自太原播徂江滋禮喪賢隱時屯道閉王

室如燬生人多殪

伊我有器思逢其主自東旋西擇木開宇田彼河曲家乎汾浦天未厭亂吾將誰輔

伊我祖德思濟九埏不常厥所于茲五遷欲及時也天豈願焉其位雖屈其言則傳

爰述帝制大蒐王道曰天曰人是祖是考禮樂咸若詩書具草貽厥孫謀永爲家寶

伊余小子信慙明哲彼網有條彼車有轍思屏人事克終前烈于嗟代網卒余來綫

來綫伊何謂余白仕我瞻先達三十方起夫豈不懷高山仰止願言毓德啜菽飲水

有鳥反哺其聲嗷嗷言念舊德憂心忉忉今我不養歲月其滔僂俛從役豈敢告勞

從役伊何薄求卑位告勞伊何來參卿事名存實爽負信愆義靜

言遐思中心是愧

元和聖德詩一首并序

韓愈

臣愈頓首再拜言曰臣伏見皇帝陛下即位以來誅流姦臣朝廷清明無有欺蔽外斬楊惠琳劉闢以收夏蜀東定青徐積年之叛海內怖駭不敢違越郊天告廟神靈歡喜風雨明晦無不從順太平之期適當今日臣蒙被恩澤日與羣臣序立紫宸殿下親望穆穆之光而其職業又在以經籍教導國子誠宜率先作歌詩以稱道盛德不可以詞語淺薄不足以自效爲懈輒依古作四言元和聖德詩一篇凡千有二十四字指事實錄具載明天子文武神聖以驚動百姓耳目傳示無極其詩曰

皇帝即祚物無違拒曰暘而暘曰雨而雨維是元年有盜在夏欲覆其州以踵近武皇帝曰嘻豈不在我負鄙爲艱縱則不可出師征之其衆十旅軍其城下告以福禍腹敗枝披不敢保聚擲首俾外降幡夜豎疆外之險莫過蜀土韋臯去鎮劉闢守後血人干牙

不肯吐口開庫嗚士曰隨所取汝張汝弓汝伐汝鼓汝爲表書求
我帥汝事始上聞在列咸怒皇帝曰然嗟遠士女苟附而安則且
付與讀命于庭出節少府朝發京師夕至其部闢喜謂黨汝振而
伍蜀可全有此不當受萬牛鬻肉萬甕行酒以錦纏股以紅帟首
有恠其兒有餌其誘其出穰穰隊以萬數遂劫東川遂據城阻皇
帝曰嗟其又可許爰命崇文分卒禁禦有安其驅無暴我野日行
三十徐壁其右闢黨聚謀鹿頭是守崇文奉詔進退規矩戰不貪
殺擒不濫數四方節度整兵頓馬上章乞討俟命起坐皇帝曰嘻
無汝煩苦荆并洎梁在國門戶出師三千各選爾醜四軍齊作殷
其如阜或披其角或脫其距長驅洋洋無有齟齬八月壬午闢棄
城走載妻與妾包裹稚乳是日崇文入處其宇分散逐捕搜原別
藪闢窮見窘無地自處俯視大江不見洲渚遂自顛倒若杵投曰
取之江中柳脰械手婦女纍纍啼哭拜叩來獻闕下以告廟社周
示城市咸使觀覩解脫纒索夾以砧斧婉婉弱子赤立偃僂牽頭

曳足先斷腰膂次及其徒體骸撐拄末乃取闢駭汗如寫揮刀紛
紜爭刳膾脯優賞將吏析珪綴組帛堆其家粟塞其庾哀憐陣歿
廩給孤寡贈官封墓周帀宏溥經戰伐地寬免租簿施令酬功急
疾如火天地中間莫不順序幽恒青魏東盡海浦南至徐蔡區外
雜虜怛威赧德跋踏蹈舞掉棄兵革私習篋簞來請來覲十百其
耦皇帝曰吁伯父叔舅各安爾位訓厥眈晦正月元日初見宗祖
躬執百禮登降拜俯薦于新宮視瞻梁楹戚見容色淚落入俎侍
祠之臣助我惻楚乃以上辛於郊用牡除于國南鱗荀毛簾廬幕
周施開揭磊砢獸盾騰挈圓壇帖妥天兵四羅旂常婀娜駕龍十
二魚魚雅雅霄昇于丘奠璧獻罍衆樂驚作轟厖融冶紫焰噓呵
高靈下墮羣星從坐錯落侈哆日君月妃煥赫嫋婉瀆鬼濛鴻嶽
祗業我飫沃羶薌產祥降嘏鳳皇應奏舒翼自拊赤鱗黃龍逶陀
結糾卿士庶人黃童白叟踊躍歡呀失喜噎歐乾清坤夷境落塞
舉帝車迴來日正當午幸丹鳳門大赦天下滌濯剗磔磨滅瑕垢

續功臣嗣拔賢任考孩養無告仁滂施厚皇帝神聖通達今古聽
聰視明一似堯禹生知法式動得理所天錫皇帝爲天下主并包
畜養無異細鉅億載萬年敢有違者皇帝勤儉盥濯陶瓦斤遣浮
華好此綈紵勅戒四方侈則有咎天錫皇帝多麥與黍無召水旱
耗于雀鼠億載萬年有富無窶皇帝正直別白善否擅命而狂既
翦既去盡逐羣姦靡有遺侶天錫皇帝庖臣碩輔博問遐觀以置
左右億載萬年無敢予侮皇帝大孝慈祥悌友怡怡愉愉奉太皇
后浹于族親濡及九有天錫皇帝與天齊壽登茲太平無怠永久
億載萬年爲父爲母博士臣愈職是訓詁作爲歌詩以配吉甫

鄆州谿堂詩一章并序

憲宗之十四年始定東平三分其地以華州刺史禮部尚書兼御
史大夫扶風馬公爲鄆曹濮節度觀察等使鎮其地既一年喪其
軍號曰天平軍上即位之二年召公入且將用之以彼之人安於
公也復歸之鎮上之三年公爲政於鄆曹濮也適四年矣治成制

定衆志大固惡絕於心仁形於色竭心力以供國家之職于時沂
密始分而殘其帥其後幽鎮魏不悅于政相扇繼變復歸於舊徐
亦乘勢逐帥自署同於三方惟鄆也截然中居四鄰望之若防之
制水恃以無恐然而皆曰鄆爲虜巢且六十年將強卒武曹濮於
鄆州大而近軍所根柢皆驕以易怒而公承死亡之後撥拾之餘
剝虜椎髓公私埽地赤立新舊不相保持萬目睽睽公於此時能
安以治之其功爲大若幽鎮魏徐之亂不扇而變此功反小何也
公之始至衆未熟化以武則忿而憾以恩則橫而肆一以爲赤子
一以爲龍蛇億心罷精磨以歲月然後致之難也及教之行衆皆
戴公爲親父母夫叛父母從仇讎非人之情故曰易於是天子以
爲尚書右僕射扶風郡開國伯以褒嘉之公亦樂衆之和知人之
悅而侈上之賜也於是爲堂於其居之西北隅號曰谿堂以饗士
大夫通上下之志旣饗其從事陳曾謂其衆言公之畜此邦其勤
不亦至乎此邦之人繫公之化惟所令之不亦順乎上勤下順遂

濟登茲不亦休乎昔者人謂斯何今者人謂斯何雖然斯堂之作
意其有謂而喑無詩歌是不考引公德而接邦人於道也乃使來
請其詩曰

帝奠九壘有葉有年有荒有條河岱之間及我憲考一牧正之視
邦選侯以公來尸公來尸之人始未信公不飲食以訓以徇孰飢
無食孰呻孰歎孰寃不問不得分願孰爲邦蠹節根之螟羊很狼
貪以口覆城吹之煦之摩手拊之箴之石之膊而磔之凡公四封
既富以強謂公吾父孰違公令可以師征不寧守邦公作谿堂播
播流水淺有蒲蓮深有蒹葦公以宿燕其鼓駭駭公燕谿堂宿校
醉飽流有跳魚岸有集鳥既歌以舞其鼓考考公在谿堂公御琴
瑟公暨賓贊稽經諷律施用不差人用不屈谿谿有蒼茨有龜有魚
公在中流右詩左書無我戮遺此邦是麻

漢隄詩一首

并序

盧肇

上元年秋漢水大溢齧襄隄以入既沈漢鄆遂滅峴趾棟榱且流

壓溺無筭襄之城僅以門免三日水去陷爲大塗餘民棲于楚山
號不敢下餒躓相挽其能全者什六七上大憂曰襄惟東南實脰
荆海若氣不息吾躬曷瘳今天下降下災于有漢庭垣盡涸齧
在淖有嬰墜并毋實號之今襄臣盡墜吾號尚及哉咨乃御士疇
能振之以易吾亂咸以地官范陽公舊理南粵島夷率化甘于民
心俾踐于襄必克底义上俞以往公既至省漢之溺由舊防之不
固幾五十載又詢之漢水之不犯襄邦惟是甚災旣魚士庶災或
能嗣孰以遏之慕民新漢之隄食敵其功資三其食因故隄之址
廣倍之高再倍之距襄之郊繚半百里明年春隄成公具以䟽上
大歡復襄之疲民一祀賑穀十萬斛民旣保寧謳歌怡愉旣而舒
蘇不知曩之災也昔狄敗衛侯于熒澤齊桓公帥諸侯城緣陵以
居之而衛國忘亡君子是以稱桓公之德今公之爲是隄也襄有
衛人之思焉而况宣天子之慈以生厥民曷齊桓之尚哉噫五材
之生沴也必極于物物之旣極天必資明哲以蘇之理之常也古

之人有力保一邑勇禦一寇謂之有功尚以金石載之況捍大災
救大患其美若是豈得無稱焉是宜以聲詩播之登于樂府惟漢
亦有瓠子之歌是可類之謹按正考甫作商詩公子奚斯命太史
克請于周作魯詩皆其國之公族也肇於公爲族孫幸力於文所
不宜默惟峴之碑曰羊公惟隄之詩曰盧公是古今之相光照也
其誰曰不然詩曰

陰沴好陽來暴于襄洎入大鄆波端若鏗觸厚推高不知其防駭
潰顛委萬室皆毀竈登蛟鼉堂集鱸鮪惟恩若離母不能子洪潰
旣涸閉閤其虛已噫我堵以剝我廬酸傷顧望若踐丘墟帝曰念
嗟朕曰南顧流災降慝天曷台怒滔滔襄郊梓我嬰孺於惟餘毗
飢傷喘呼歔斯爲浩瘼孰往膏傅惟汝元寮僉舉明哲我公用諧
苴茅杖節來視襄人煥焜六休焜又提挈不日不月哈乎抃悅乃
詠故隄陷于沙泥缺落坳圯由東訖西公曰嗚呼漢之有隄實命
之命襄人不力乃力則及乃身具鋪與畚漢隄其新帝廩有粟帝

府有緡爾成爾隄必錫爾勤襄人怡怡聽命襄許背囊肩杵奔走
蹈舞分之卒伍今以麾鼓尋尺旣度日月可數登登業業周旋上

下披峴斲楚

楚峴二山在襄南

飛石輓土舉築殷雷駭汗霏雨疲癯鰥獨

奮有筋膂呀吁來助提筐負筥不勞其勞雜沓笑語咸曰盧公來
賜我生斯隄旣成蜿蜿而平確爾山固屹如雲橫漢流雖狂堅不
可蝕代千年億與天無極惟公之隄昔在人心旣築旣成橫之于
南萌渚不峻此門不深今復在茲于漢之陰斯隄已崇茲民獲祐
觀童相慶室以完富貽于襄人願保厥壽繫公之功赫焉如畫捍
此巨災崒若京阜天子錫之百姓載之族孫作詩昭示厥後

有所恨二章

并序

歐陽詹

有所恨由故人馬紳死而興也予待試京師六年與馬生相知者
四秋性與情相合也衣與食相同也予及第歸覲故園自別來無
憶不至於襟懷無想不至於姿容願一促膝怒如也昨旣至止馬
生且疾巫者忌以見人曰不見即愈見即害遂忍即見庶以求見

忍者五日馬生云亡噫故人也昔越萬里猶求見焉惑乎一言蔽乎一垣而死生以之死生之道千秋之離也五日之面半旬之歡也尚可半旬之歡不就而卒甘千秋之離一恨也又與生別捺執都門生脫紫羅半臂曰即日相去秦吳聊以爲憶予貧也素乏衣服不暇藏篋笥聯縣在身二年間同弊帛以棄所以新而輕著故而不留者予實未衰馬其方少爾斯日日相與也所留何止在茲乎今人既往所贈又造次而亡之二恨也申二恨爲有所恨二章云

我思君子吁嗟萬里亦既云止曷不觀止本不信巫而巫言是履在門五日如待之死有所恨兮

我思遺衣爲憶以貽亦既受持曷不保持本不欺友而友情是違隔生之贈造次亡之有所恨兮

河之水二章寄姪老成

韓愈

河之水去悠悠我不如水東流我有孤姪在海陬三年不見兮使

我生憂日復日夜復夜三年不見汝使我鬢髮未老而先化 河之水悠悠去我不如水東注我有孤姪在海浦三年不見兮使我心苦采薇于山緡魚于泉我徂京師不其還

重校正唐文粹卷第十一

國

卷上

三

